

ခြပ်ရိုးတမျှင်နုအလင်း
ဝံသ

ပုံနှိပ်မှတ်တမ်း

- စာရိုးသူ - ဝံသ
- စာအုပ်နာမည် - ခြင်္ဂိတမျှင်နွအလင်း
- ထုတ်ဝီရေခုနှစ် - ၂၀၁၅ ခုနှစ်၊ ဒီစမ်ဘာလ
- ထုတ်ဝီရေအကြိမ် - ပထမအကြိမ်
- အုပ်ရွီ - ၆၀၀
- မျက်နှာဖုံးဒီဇိုင်း - မြတ်ဌေး(ပေါက်လေ)

မာတိကာ

- (က) ရောင်နီပျိုမျဉ်းရို့ လားရာလမ်း (ခိုင်ထွီး)
- (ခ) ရင်တွင်းဆန္ဒ ခိုင်မင်းဇံ(ရခိုင်ပြည်)
- (ဂ) စာပီလမ်းပြ မီးရှူးသျှော့အလှ
ဇော်ထွန်းလင်း (ရက္ခိတသွီး ရက္ခိတသား)
- (ဃ) ကဗျာသည်အကျွန်(ဝံသ)နု ကျေးဇူးစကား ဝံသ

၁။ ဝံပုလွီဆင်ပရိယာယ်ကြိုး	၁၈
၂။ ကမ္မပစ္စယကို သရုပ်ခွဲကြည့်ခြင်း	၂၀
၃။ ညဦးရာခွက်ထဲက တည်ကမ္ဘာ	၂၁
၄။ ဘူတာနံပါတ်-၃၁	၂၂
၅။ မိုးရိပ်တခဲနန့် မာတိကာ	၂၄
၆။ ပုံသီတခု အက်ကွဲအဓိပ္ပာယ်	၂၅
၇။ ပစ္စက္ခဝဠာပြင်က နွီသရုပ်ပြကွက်များ	၂၆
၈။ ဖိလိုဆိုဖီ	၂၈
၉။ ကြယ်သဘင်မှားည	၃၀
၁၀။ လူ့သမိုင်း	၃၂
၁၁။ သင်္ကေတတခုတွက်ခြီ	၃၃
၁၂။ ရာသီကြိုမျက်ဝန်းထက်က ကဝေပျိုအနမ်း	၃၄
၁၃။ အနန္တထဲက အကျွန်သခင်	၃၆
၁၄။ လောကကိုများရေ သီးကြွီတစင်းအကြောင်း	၃၇
၁၅။ နှင်းဖြစ်ခွင့်မဟိရေ အရိပ်စီးသံသရာ	၃၈

၁၆။ ဖယ်ခွာမရရေအရီခွံ	၄၀
၁၇။ ပယောဂလမ်းဆုံ	၄၂
၁၈။ ဗလာနယ်တဖက်က (+) = (-)	၄၄
၁၉။ ယုတ္တိမဆန်ခ အမောဖောက်ဖွဲများ	၄၆
၂၀။ နှစ်ပင်လိမ်ပြဇာတ်	၄၈
၂၁။ ငါမသိလိုက်သော မရဏလက်တကမ်း	၅၀
၂၂။ ကောက်ကြောင်းပျိုနီဒါန်း	၅၂
၂၃။ ရင်ကစီးဆင်းရတနာသိုက်နန့် ငါ့ဥယျာဉ်	၅၄
၂၄။ သတ္တုမပါသော ဒုလ္လဘနာရီ	၅၇
၂၅။ ဘာဝနာမမြဲခ ရမ္မက်ကောင်းခင်	၅၈
၂၆။ တဏှာဝိပါတ်နုအကြောင်းဆက်နန့် လည်ဇောင်လာခရီးသည်	၆၀
၂၇။ အာဟာရတကြောပင်အိမ်	၆၂
၂၈။ အနာဂတ်ပျိုးခင်းနန့်ကိုယ်စီအတ္ထုပ္ပတ်	၆၄
၂၉။ မြို့ဒိုင်ယာရီ	၆၆
၃၀။ တနိုင်တပိုင်သီဆုံးခြင်း	၆၈
၃၁။ မွီးဖွားခြင်းမှ	၇၀
၃၂။ သိုလှောင်ခြင်းနက်ဖန်ခါသို့	၇၂
၃၃။ ကွက်လပ်	၇၄
၃၄။ လောင်းရိပ်ပိသကြင်	၇၆
၃၅။ မှန်ဝါးပြယ်ဂန္ထဝင်	၇၈
၃၆။ ရှိုးမသစ်သီး	၇၉
၃၇။ ပကတိထိုးတန့်နီသောလက်တံ	၈၀
၃၈။ ဝင်သက်မှားခြံသံတစုံ	၈၂
၃၉။ မီးခိုးမထွက်တေရွာ	၈၄
၄၀။ ရုပ်ပြပညတ်တခုကမိုးမလင်းဘုံ	၈၆
၄၁။ အညှာခိုင်အမွှီးဆုံးပန်း	၈၇

ခြပ်ရိုးတမျှင်နုအလင်း	၅
၄၂။ ဘဝငတ်သူတယောက်ဝတ်လက်စဘဝ	၈၈
၄၃။ မော်ဒန်အလွမ်း	၉၀
၄၄။ ရာဇဝင်သားကောင်	၉၂
၄၅။ ခြပ်ရိုးတမျှင်နုအလင်း	၉၄
၄၆။ ရှိုင်သမ်	၉၇
၄၇။ ပုစ္ဆာ	၉၈
၄၈။ ကဗျာ	၁၀၀



ရောင်နီပျိုမျဉ်းရို့ လားရာလမ်း

အကျွန် နန့် ဆရာဝံသ ရို့ရေ တယောက်ကိုတယောက် မမြင်ဖူးပါ။ သိဖို့စွာဆိုကေ အဝီးကြီးပါ။ ယေကေလေ့ အကျွန် ရို့စွာ ရခိုင်ကဗျာရုပ်ခန္ဓာထဲမှာ ရှင်သန်ကြီးထွားဖို့ အားယူပနာ လှုပ်ယှားနီကတ်တေ အသွီးအသား ဆဲ(လ)မျှင်ချေချင်းတော့ခါ တူကတ်ပါရေ။ ယင်းကတဆင့် အာရုံခံစားချက်တိ ရင်းနှီးပနာ ဆွဲမျိုးစပ်ခကတ်လို့ အွင်လိုင်းရခိုင်ကဗျာလောကမှာ ဆုံလှာ ကတ်ပါရေမလားယေ။ အသက်ငင်နီရေ ရခိုင်လူ့ဘောင်ထဲက ယဉ်ကျေးမှု၊ အနုပညာရို့ဆိုစွာ တဖုတ်ဖုတ် လှုပ်ခါပြီးကေ မြည် နီရေ နှလုံးခုန်သံချေလောက်ရာ ကြားရပါယာ။ ယင်းကြားထဲ က ကြိုးစားပမ်းစား ဖန်တီးထားရေ ကဗျာအနုပညာပန်းရနံ့ချေ တိကို ခံစားပနာ ယှူလူတိဟိရေပိုင် နှာခေါင်းပိတ်ပနာ မျက်စိ နှိတ်ထားရေ လူတိလေ့ ဟိပါဖို့နှုန်းရာ။ ဇာပင်ဖြစ်ဖြစ် ခေတ်ရီ စီးကြောင်းထဲမှာ ရခိုင်ခေတ်သစ်ကဗျာတိ ကမ္ဘာကို ရင်ဘောင် တန်းဖို့ ရောင်နီပျိုမျဉ်းစင်းရို့ ဆုံမှတ်တခုသို့ ခရီးဆက်နီကတ်စွာ မှာ ဆရာဝံသလေ့ ဆိုက်ဘီးရီးယားငှက်ပိုင် ရှိတန်းက တအား ပါဝင်လိုက်ပါယာ။ တချို့ကတော့ခါ ရင်ကို စည်တီးချင်ကေ တီးပါဖို့။ အကျွန်ကတော့ခါ လက်ခုပ်ဩဘာတီးလို့ ကြိုဆိုပါ ရေ။

ဒေပိုင် ကြိုဆိုရယောင် အသင်က ဇာကောင်လေးလို့ စောဒကတက်လှာကေ ပြီးစရာလမ်း ရဖို့မမြင်ပါ။ ယေကေလေ့ ပစ်သရွှိကို ကိုယ့်စွာကိုယ် လှုပ်တိလှုပ်တောင် ထောင်နီရေ ပစ် တိုင်းထောင်တော့ခါ မဟုတ်လောက်ပါ။ ကျိန်းသီစွာက ကဗျာ တိုကဗျာစချေတိကို မတောက်တခေါက် ရီးသားနီရေ ကဗျာ

လောကသားကောင်ပါ။ ဒေကဗျာလောကသားကောင်ကို ဆရာဝံသမှာ စကြာဝဠာမောင်နန်းမှားပနာ အားကိုးတကြီး အမှာစာရိုးပီးဖို့ ပြောလှာစွာလို့ ထင်လားပါရေ။ ယင်းကြောင့် အမှာစာရိုးဖို့မနံပါလို့ ပြန်ပြောလိုက်ပါရေ။ ယေမှာ သူက အမှာစာဆိုကေ ရပါယာလတ်။ ဆရာဝံသ အားနန့်ပျင်လှာကေ ဒေကလေ့ မဆမအိမ်ငြောက်က ဓားအဆိုးချေကိုယူပနာ ထုတ်ပြဖို့ ကျပါယာမလားယေ။

ကိုင်... ယေကေ ကဗျာကို အကျွန်နားလည်စွာက အာရုံခံစားချက်တိ၊ ကိုယ်ပြောစွာချင်တိကို ကဗျာအဖြစ် သရုပ်ဖော်ထားစွာလို့ရာ ပြောချင်ပါယင့်။ တချို့ကတော့ခါ ကာရန်မပါကေ ကဗျာမဟုတ်လို့တောင် ပြောကတ်ပါယင့်။ ယင်းပိုင်ပုံသီပြောပစ်လို့ သင့်တော်ပါဖို့လား။ ကဗျာကို တချို့က ဖွဲ့ဖွဲ့နွဲ့နွဲ့ ရိုးချင်ကေရိုးပါဖို့။ တချို့က အာရုံမှာပေါ်လှာရေအနှုန်း ချရိုးချင်ကေ ရိုးပါဖို့။ ယင်းပိုင်ရိုးကတ်စွာမှာတခါ တချို့က ကာရန်ချေချိတ်၊ နဘေချေထပ်ပနာ ပုံသဏ္ဍာန်၊ အကြောင်းအရာတိကို ပါ အလီးပီးလို့ ရိုးချင်ကေရိုးပါဖို့။ တချို့က လုံးဝရွတ်လပ်တေပုံစံနန့် ရိုးချင်ကေရိုးပါဖို့။ အဓိကတော့ခါ ပီးချင်စွာ၊ ပြောချင်စွာတိကို အနုပညာဆန်ဆန် ရင်ဖွင့်ပြကတ်စွာပါ။ နားထောင်ရေလူတိနား၊ ဖတ်တေလူတိမျက်စိတိလေ့ အနုပညာဆန်ဆန် ခံစားတတ်ဖို့လိုပါလိမေ။ အနုပညာဆိုစွာကလေ့ ခေတ်ကာလပြောင်းလှာစွာနန့်အညီ ဆန်းသစ်မှုတိ ကပ်ပါလှာပါဖို့။ ယင်းဆန်းသစ်မှုတိထဲမှာ ကွဲပြားခြားနားမှုတိလေ့ ဟိပါဖို့။ ဥပမာဂီတအနုပညာကို ကြည့်ပါပလင်။ အမျိုးအစားတိ ကန်ကမကန်ပါ။ ယင်းအထဲက သူ့အကြိုက်နန့်သူ ခံစားကတ်စွာ မဟုတ်ပါလား။ ကဗျာအနုပညာဆိုစွာလေ့ ဖန်တီးမှုတိ တရက်ထက် တရက် ဆန်းသစ်ပြန်ပွားလှာပါဖို့။ ဒေခေတ်ပေါ်ကဗျာတိကို ကိုယ်မခံစားတတ်ကေ ခံစားတတ်တေလူတိအတွက် အပြုသ

ဘောနန့် လမ်းဖွင့်ပနာ ချန်ထားခပါ။

နောက်ဆုံးပြောချင်စွာက ရခိုင်ကဗျာလမ်းက တဆတ်ဆတ် ကျယ်လှာဖို့ရာ ဟိပါရေ။ အိမ်နားပါးချင်း တတိုင်သားနန့် တတိုင်သား နည်းနာယူကတ်စွာ အချအတင် ဟိကတ်တေပိုင် ကမ္ဘာကြီးမှာလေ့ ကဗျာဆရာရို့ရေ မတူညီကွဲပြားရေ ယဉ်ကျေးမှု၊ ဘာသာစကားတိပါးက နည်းပညာတိ၊ ပုံသဏ္ဍာန်တိကို ကိုယ့်နည်းကိုယ့်ဟန်နန့် မွီးထုတ်လိဟိကတ်ပါရေ။ ယင်းပိုင် နည်းနာယူစွာမှာ ရုပ်စွပ်တူယောင်ယူကတ်ကေ ရခိုင်ကဗျာလို့ ခံယူကေလေ့ ရခိုင်ကဗျာစစ်ပါဖို့သိလားယေ။ ရခိုင်ဘာသာစကားကို သုံးရုံလောက်နန့် ရခိုင်ကဗျာဖြစ်နိုင်ဖို့ မထင်ပါ။ ယင်းတွက်နန့် ကျယ်ရေလက်စ ကမ္ဘာနန့်ရင်ဘောင်တန်းနိုင်ယောင် မွီးထုတ်ဖန်တီးပနာ ကိုယ့်နည်းကိုယ့်ဟန်နန့် ရခိုင်ကဗျာသာ လမ်းကို လျှောက်လှမ်းကတ်ဖို့ လိုပါလိမေ။

ထော. . . ဒေဂု ဆရာဝံသကတော့ခါ ဒုတိယမြောက် 'ခြံပိရိုးတမျှင်ဒုအလင်း' လို့ နာမည်ပီးထားရေ ရောင်နီပျိုမျှင်တကြောင်းကို ဆက်ဆွဲလိုက်ပါယာ။ ဆရာဝံသနု လက်ရာ ဇာလောက်ဖြောင့်ယောင် ဆွဲနိုင်လေဆိုစွာကို သူ့ကဗျာတိကို ဖတ်ရှုခံစားကတ်တေ ကဗျာချစ်သူရို့ လက်ခုပ်သံကို နားထောင်လို့ သိနိုင်ပါရေ။ ဟုတ်လာ၊ မဟုတ်လာဆိုစွာကို ဆရာဝံသနု အားထုတ်မှု ဒုတိယခြံလှမ်းနန့် လျှောက်လှမ်းထားရေ ရခိုင်မော်ဒန်ကဗျာတိကို ဖတ်ရှုခံစားကြည့်ကတ်ပါ။ မော်ဒန်ကဗျာချစ်သူရို့ အတွက် အားရပါးရကျဖို့လို့ ယုံကြည်ပါရေ။ နောက်ထပ်လေ့ ရောင်နီပျိုမျှင်တန်းရို့ ရှိသို့အားမာန်ချီပနာ လားကတ်ပါ။ ဆုံကတ်ပါ။ ရခိုင်ကဗျာပန်းချေတီ သာသာယာယာ သင်းထုံမွီးကြိုင်ကတ်ပါစီ။

ခိုင်ထွီး
(၂၂/၀၉/၂၀၁၅)

ရင်တွင်းဆန္ဒ

အချိန်တိက တနားချေရာကြာရေပိုင် တို့လိုက်ပါရေ။
 ကဗျာဆရာဝံသတယောက် ဒုတိယမြောက်ကဗျာစာအုပ် ထုတ်
 ပါဖို့ဗျာလ်လတ်ထော။ ကြားရစွာ ဝမ်းသာမိရေပိုင် ကျေးဇူးလေ့
 တင်ပါယင့်။ ဝံသနု စာရိုးသက်တမ်းရေ ကောင်းမကြာပါသိ။
 ယေလေ့ အချိန်အတို့ချေအတွင်းမာ ရခိုင်ကဗျာလောကအ
 တွက် အားကိုးလောက်တေ ကဗျာဆရာတယောက်ဖြစ်ပါလတ်
 တေ။

ရခိုင်ကဗျာတိနန့် ပတ်သက်ပနာ အယူအဆအမျိုးမျိုး
 ဟိကတ်တေအတွက်နန့် ဆရာဝံသနန့် အကျွန်ရေ ရခိုင်ကဗျာ
 တိကိုမြင်ရေ အမြင်ချင်းတူချင်မှလေ့ တူပါဖို့။ ယေရာလေ့ ရခိုင်
 စာပီကို တန်ဖိုးထားမှုချင်းက တတူတူပင်ဖြစ်ပါရေ။ ရခိုင်ကဗျာ
 ရိုးခြင်းရေ ရခိုင်ကဗျာလောကကို အကျိုးပြုမှုဖြစ်တေပိုင် ရခိုင်
 စာပီကိုလေ့ ကျေးဇူးပြုရာရောက်ပါရေ။ ယေနန့် ရခိုင်ကဗျာဆ
 ရာတိကို တန်ဖိုးထားပါရေ။

အမှန်အတိုင်းပြောရကေ အကျွန်ရေ ကဗျာနန့်ပတ်
 သက်လို့ အရိုးသင်အဆင့်မာရာ ဟိပါရေ။ ယေနန့် ဆရာဝံသ
 နု ကဗျာတိကို ကောင်းရေ၊ မကောင်းဆိုစွာကို ရဲ့ဝံစွာပြောနိုင်
 စွမ်းမဟိပါ။ ယေကေလေ့ ဝံသရေ ခေတ်သစ်ရခိုင်စာပီသဘော
 တရားကို နားလည်သူတယောက်ဖြစ်တေဆိုစွာ အာမခံဝံပါရေ။
 ယင်းအချက်ရေ ရခိုင်သားတိုင်းမာ မဟိရေပိုင် ရခိုင်စာပီသမား
 တိုင်းမာလေ့ မဟိရေအတွက် ဝံသကို ရခိုင်စာပီလောကအ
 တွက် အားထားရဖို့ ကဗျာဆရာတယောက်အဖြစ် မြင်မိပါရေ။

ရခိုင်ကဗျာနန်းပတ်သက်လို့ ရှိုးခေတ်ရခိုင်ကဗျာတိကို လိလာကြည့်ရေခါ ရခိုင်ကဗျာရေ ရခိုင်စကားပြောစွာနန်းမပြီး၊ ရခိုင်ရုပ်ပေါက်ဖို့လေ့လိုရေလို့ နားလည်မိပါရေ။ ရခိုင်ကဗျာတိ ရေ လေးလုံးစပ်မာ အခြံတည်ပါရေ။ ဒွေးချိုး၊ လေးချိုး ရှို့ပိုင် ကဗျာမျိုး ရှိုးရခိုင်ကဗျာတိမာ မတို့ရပါ။ ရှိုးရခိုင်ကဗျာတိကို အပြိန်းကြည့်ကေ ကဗျာစပ်ပုံစပ်နည်းအများစုရေ ဗမာတိနန်းမ တူပါ။ ဒေဖက်ခေတ်မာကျခါ ရခိုင်ကဗျာအများစုနု ပုံပန်း သဏ္ဍန်ရေ ဗမာကဗျာတိနန်း တူလှာစွာကိုတို့ရပါရေ။ တချို့က ဗျာတိကို ရွတ်လပ်ကာရန်နန်း ရိုးဖွဲ့ကတ်တေပိုင် တချို့ကဗျာတိ မာ ကာရန်မတို့ရ။ ကဗျာရေ ရသစာပီပင်ဖြစ်ကေလေ့ ဝတ္ထုနန်း မတူပါ။ အကျွန်အယူအဆအရဆိုကေ ကဗျာဆိုစွာ တေးခြင်း (သာခြင်းတမျိုး)ဖြစ်တေ။ ယင်းအချက်ကို ကဗျာရွတ်ပွဲတိက ထောက်ခံနီပါရေ။ ကဗျာနန်းတေးခြင်းရေ အနုရသစာပီဖြစ် တေဆိုရေအချက်မာလေ့သော့ တူညီစွာကို တို့ရပါရေ။ ကဗျာ ရေ ရသမြောက်ရုံနန်းမပြီး၊ နားထောင်ကောင်းဖို့လေ့ လိုအပ်ပါ ရေ။ ယေနန်း နားထောင်ကောင်းဖို့အတွက် ကဗျာမာ ရှိုင်သမ် (ကာရန်)လိုအပ်ရေလို့ ယူဆမိပါရေ။ ဇာပိုင်ပင်ဖြစ်ဖြစ် အနုပ ညာဆိုစွာ အနုပညာဖန်တီးသူရို့နု လက်ထဲမာဟိရေအတွက် နန်း ရခိုင်ကဗျာတိုးတက်ဖို့အတွက် ရခိုင်ကဗျာဆရာတိ အား ထုတ်ဖို့လိုအပ်ပါရေ။ ရခိုင်ကဗျာတိ တိုးတက်လှာကေ ရခိုင်စာ ပီလေ့ အရောင်တောက်ပြောင်လှာဖို့ ဖြစ်ပါရေ။ ကဗျာဆရာဝံ သတယောက် ရခိုင်ကဗျာအာကာမာ ပျံသန်းယင်း အဖနိုင်ငံ တော်အထိ ခရီးဆက်နှိုင်းပါစီလို့ ဆန္ဒပြုယင်း။

သာစွလေ . . . ။

ခိုင်မင်းဇံ(ရခိုင်ပြည်)

စာပီလမ်းပြ မီးရှူးသျှအလှ

xxxxxxxxxxxx

“အာရက္ခဝဠာအတွက် စိမ့်ဖြာထွက်လတ်တေ
 ခြပ်ရိုးတမျှင် အလင်း
 ခြပ်ရိုးတမျှင် အလင်း
 ခြပ်ရိုးတမျှင် အလင်း
 အမြစ်တွယ် ရင်သား Cancer က
 ပြည်ပျိုပြည်အိုရိုး တနုနုထွတ်စား
 အတိတ်ထည်ဝါခြင်း ဗိသုကာတိ သွီးအိုင်လူး
 ဟောင်းလောင်းပွင့် ခြပ်ရိုးပြီ
 ဂန္ထဝင်ညည့်ထက် သစ္စာတော်တည်
 ရင်ဘတ်နုနုသီကုံးဖို့
 ခြပ်ရိုးတမျှင် အလင်း
 ခြပ်ရိုးတမျှင် အလင်း
 ခြပ်ရိုးတမျှင် အလင်း . . လာပျာ”

ကဗျာစာအုပ်နု ရောင်းစီးက ‘ခြပ်တမျှင်နုအလင်း’ပါ
 လတ်။ ကဗျာနံပါတ်လေးဆယ့်ငါးမှာ ယင်းကဗျာကို ဖော်ပြ
 ထားပါရေ။ လိုက်ရှာပြီးကေ အစအဆုံး ဖတ်ကြည့်ပစ်စွာ လေး
 ငါးခေါက်ကျလားရေ။

‘သာစွလေပါ အစ်ကို၊ ရခိုင်မော်ဒန်ကဗျာ စင်းသီးတ
 အုပ် ထုတ်ပါဖို့လို့ အမှာစာရီးပီးပါပလင်’

ယင်းနိက လူငယ်ကဗျာဆရာ ဝံသ က အကျွန်ုပ်ကို ဘုန်း
 ကြီးပင့်ပိုင် လာပင့်ပါထော။ အကျွန်ုပ်က စာပီလောကထဲမှာ

ဇာဆိုဇာလေ့မဟုတ်တေ အွင်လိုင်းထက် ထီးထမ်းလမ်း
လျှောက် ယောင်သတ်နီရေ မြောရီမြောမြောတကောင်ဆိုစွာ
ကို သူသတိထားပုံမရ ထင်ပါရေ။ ယင်းနန့် ‘ပျံပါရေပ အစ်ကို’
လို့ ချက်ချင်းတုံ့ပြန်လိုက်ပါရေ။

အမှန်က အမှာစာရို့၊ ဆောင်းပါးရို့ဆိုစွာ ဆရာဆရာ
ကြီးတိရာ ရိုးလိရိုးထဟိကတ်ပါရေလေ။ ယေကေလေ့ အကျွန်
က လူမြောက်ကြိုက်ဆိုခါ ကိုယ့်နန့်တန်လာ မတန်လာမသိ
ငင်စွာပါယာမနားယေ။

ဝံသ ဆိုစွာကလေ့ လူငယ်ကဗျာဆရာတိ တောထဲမာ
ဆိုကေ ပုရွက်စိတကောင်မဟုတ်ပဲ ဆင်တကောင်လို့ ဆိုရပါလိ
မေ။

ကာရန်တိကို နိုင်ရေလူ၊
ရခိုင်ဝေါဟာရအစင်တိကို ရှိုးထုတ်တတ်တေလူ၊
စာလုံးပေါင်းသတ်ပုံဆိုကေလေ့ ရခိုင်ဖတ်စာ၊
ဆရာတော်ဇယန္တပေမိနန့် ဆရာကြီးမောင်ဗသိန်း
ရို့နောက်လိုက်ဆိုခါ ပြောစရာ မဟိလောက်ယောင်ပါ
ယာလေ။

ကမ္ဘာလူမျိုးတိုင်းမာပိုင် စာပီတိ ကိုယ်စီဟိကတ်ပါရေ။
ယေရာလေ့ အကျွန်အမြင်အရ ဒေကဗျာတိ မပေါ်ပေါက်ခဆို
ကေ စာပီဆိုစွာလေ့ ပေါ်ပေါက်လှာဖို့ မထင်ပါ။ ရှိုးခေတ်လူ
သားရို့နု ပါးစက နိစိုင်ရွတ်ဖတ်နီကတ်တေ ကဗျာတေးသားတိ
ကို ပြုစုမှတ်သားဖို့အတွက် တခုခုအထက်မာ အမှတ်အသား
တင် လုပ်ကတ်ယင်းက စနစ်ကျရေ စာပီအက္ခရာတိ ပေါ်
ပေါက်လှာစွာ ဖြစ်ပါဖို့။ ယင်းပိုင်နန့်ပင် ကဗျာအဖွဲ့အနွဲ့တိကို
စည်းဘောင်တိနန့် ခတ်လှာကတ်၊ သတ်ပုံတိကို စနစ်တကျပျင်
လှာကတ်ပြီးကေ စံစာပီတိ တွင်ကျယ်လှာစွာ ဖြစ်နိုင်ပါရေ။
စာပီအစ ကဗျာကလို့ ဆိုချင်ကေ ဆိုနိုင်ပါရေ။ ရခိုင်စာပီမာဆို

ကေလေ့ သိန်ကန်မိန်ကဗျာရို့က ဂုထိ ကျားကန်ခံထားလို့ အ
သက်မထွက်ပဲ နာလံပြန်ထူနှိုင်းစွာလို့ ဆိုရပါဖို့။

ထော. . ဂု ‘ခြပ်ရိုးတမျှင် အလင်း’ ကဗျာစာသားတိကို
ကြည့်စွာနန်ပင် ဝံသရေ မော်ဒန်ကဗျာတိကိုလေ့ ပိုင်ပိုင်နိုင်နိုင်
သီကုံးရိုးဖွဲ့တတ်တေ မနုဿဆိုစွာ မှန်းကြည့်နိုင်ပါရေ။

နိမိတ်၊ ရိုင်းသမ်၊ မြှုပ်ကွက်တိက မော်ဒန်ကဗျာရို့ကို
ကောင်းခြင်း၊ မကောင်းခြင်း ဖွင့်ဟစွာပါမနား။

အဂေါင့်ဂေါင့် မျှော်လင့်ချက်ထားတမ်းဆိုပါကေ ရခိုင်
စာပီလမ်းခရီးနု သိုင်ခေါင်ညည့်တိကို ဒေ ‘ခြပ်ရိုးတမျှင်အလင်း’
က မီးရှူးတချောင်းပိုင် လမ်းပြနိုင်လိမေ ယုံကြည်ပါရေလို့ ပြော
ကြားယင်း အကျွန်အမှာစာကို ဒေမာပင် တန့်လိုက်ပါမေဖိ။

သာစွလေ . . . ။

ဇော်ထွန်းလင်း(ရက္ခိတသွီး ရက္ခိတသား)

ကဗျာသည်အကျွန်(ဝံသ)နဲ့ ကျေးဇူးစကား

ဦးစွာပထမ ကျေးဇူးစကားမဆိုဖြစ်ခင် ရခိုင်စာပီလမ်း၊ ရခိုင်စာပီအပေါ်ခံယူချက် အကျွန်အမြင်တို့ကိုဆိုကေ ရိုးသားပါရစို့။

အကျွန်ရို့မှာ ဘာသာဗေဒဖက်က နှိုင်းယှဉ်သုံးသပ်ကြည့်ဖို့ဆိုပါက အမျိုးသားရိုးကို လိုက်စားကတ်တေ ခေတ်လူငယ်၊ လူကြီးတိ အင်တန်ဟိကြောင်း တွိရပါရေ။ အမျိုးသားရိုးကို လိလာလိုက်စားသူများသလောက် ဘာသာဗေဒစာပီသဘောတရားပိုင်းဆိုင်ရာဖက်မာကျကေ ကိုယ့်စာပီအရိုးအသား၊ ကိုယ့်ဘာသာစကားကို သုတေသနလုပ်၊ ဖော်ထုတ်လိုက်စားရေလူတိ ကကောင်းနည်းရေလို့ ဆိုရမေဖြစ်ပါရေ။ ဇာကြောင့်လေးဆိုစွာကိုတော့ အကျွန်မဖြည့်တတ်ပါ။

လူအများစုက အမျိုးသားရိုးကို စိတ်ဝင်စားကြောင်း တွိရပါရေ။ အမျိုးသားရိုးကို စိတ်ဝင်စားစွာ ကောင်းပါရေ။ ယေရာလေး တဖက်မာက ကိုယ့်ဘာသာစကား စာပီအရိုးအသားတိကို လိလာလိုက်စားသူ နည်းပါးလှာရေအတွက် ကိုယ့်စကား၊ ကိုယ့်စာပီရို့ရေ တဆတ်ဆတ်ပျောက်ကွယ်လှာစွာကို တွိရပါရေ။ ယေနန့် ကိုယ့်စာပီအရိုးအသား အားနည်းနီရေမလားယေလို့ ယူဆပျာ လူအများစုမလျှောက်တေလမ်းကို ကိုယ့်ခံယူချက်၊ ကိုယ့်အမြင်နန့်ကိုယ် ချွံ့ချယ်ပျာလျှောက်ဖို့ ဆုံးဖြတ်ခပါရေ။

ဇာကြောင့်ယင်းပိုင် ဆုံးဖြတ်ရလေးဆိုပါကေ အားနည်းသူကို အားကူလျှောက်ထည့်ချင်ရေ ဆန္ဒကြောင့်ရာဖြစ်ပါရေ။ အရိုးသားဆုံးဆိုရပါကေ လူမျိုးတမျိုးမှာ ဘာသာစကား စာပီ

အရိုးအသားဟိကို ဟိသင့်ရေ။ ကိုယ်ရို့လမ်းထွင်း ယှင်းလင်း
 နိုင်မှ နောက်ကတက်လှာရေ မျိုးဆက်သစ်တိ လမ်းပြောင့်
 ပြောင့်ကို လျှောက်နိုင်ဖို့ဆိုရေ အာသီသထက်မပိုပါ။ ယေနန့်
 ခံယူချက်ကိုယ့်အမြင်တိကို ဇာနန့်လမ်းခင်းနိုင်ဖို့လေးလို့ ကိုယ့်
 ကိုကိုယ် ပြန်စိစစ်ကြည့်ပါရေ။ လူ့သဘာဝအရ အရာဝတ္ထုတခု
 ခုကို ပုံဖော်သွန်းလုပ်ကတ်တေခါ ကိုယ်ပိုင်ရာဆိုင်ရာဖက်က
 အကျိုးပြုကတ်တေ မဟုတ်ပါလား။

မနိုင်ရေဝန်ကို ထမ်းဖို့တက်စား ကိုယ်နိုင်ရေဖက်ကရာ
 အုတ်တချပ်၊ သဲတပွင့်အဖြစ် အကျိုးပြုချင်ရေဆန္ဒကြောင့် ရခိုင်
 ကဗျာတိကို မနိုင်တနိုင်စရီးခပါရေ။ အကျွန်ရို့မှာ ကိုယ်ပိုင်စာပီ
 ဟိမှန်းမသိခင်က အကျွန်ရေ မြန်မာစာပီလောင်းရိပ်အောက်
 မာ မြန်မာကဗျာတိကို ရီးခပါရေ။ အကျွန်ရို့မှာ စာပီ၊ သမိုင်း၊
 ကိုယ်ပိုင်ယဉ်ကျေးမှုဟိရေလို့ သိလိုက်တေအချိန်ကစပြီးကေ
 ကိုယ့်စာပီ၊ ကိုယ့်သမိုင်း၊ ကိုယ့်ယဉ်ကျေးမှုတိကို တန်ဖိုးထား
 တတ်လှာပါရေ။ ချစ်တတ်လှာပါရေ။ မြတ်နိုးလှာပါရေ။ ယေ
 နန့် အနုပညာဥယျာဉ်ထဲမာ ရခိုင်ကဗျာတိကို စိုက်ပျိုးနိုင်ခကေ
 ရခိုင်မော်ဒန်လောကကို မြင့်တင်ပီးရာလေး ရောက်တေပိုင်
 ဘာသာစကား၊ ယဉ်ကျေးမှု၊ ဓလိရိုးရာတိကိုပါ ထိန်းသိမ်းရာ
 ရောက်ဖို့ ဆိုရေစိတ်ကူးနန့် (၂၀၁၅ ခုနှစ်-မေလ)မာ ‘ကန္တာရ
 နှင်းစက်ခြံရာ’ ကဗျာစာအုပ်ကို ထုတ်ဝီခပါရေ။

မပြည့်ရေအိုးတလုံးဖြစ်တေ အကျွန်ရေ ‘ကန္တာရနှင်း
 စက်ခြံရာ’ ကဗျာစာအုပ်ကိုထုတ်ဖို့ စိတ်အားထက်သန်လို့ရာ
 ထုတ်ဖြစ်ခကေလေး မော်ဒန်ကဗျာအတတ်ပညာ အားနည်းမှု
 တိ ဟိခပါရေ။ ပါဠိအသုံးအနှုန်းဆီကေ လွဲမှားမှုတိလေးဟိခ
 ရေ ဆိုစွာကို အရိုးသားဆုံးဝန်ခံပါရေ။ ဇာကြောင့်ယင်းပိုင်
 ဖြစ်ရလေးဆိုပါကေ ကဗျာရီးသက်နုလို့ပါ။ မော်ဒန်ကဗျာအ
 တတ်ပညာကို အလီးထားမှုနည်းခပါရေ။

အားလုံးကို ချုံပြောရပါက အတို့အကြံ မရင့်ကျက်ပါ သီး။ ကောင်းကောင်းကြီးလိလာဖို့ လိုအပ်ပါသီးရေ။ စားကေ လေး ကဗျာ၊ လားကေလေး ကဗျာအကြောင်းဆိုရပိုင် ကဗျာ ဥယျာဉ်ဝမာ အညောင်းဆန့်ယင်း အချိန်တိတရွိရွိ ကုန်ဆုံးခပါ ရေ။ ယှဉ်တိနန့် နီဖန်များလှားလို့လား မဆိုနိုင်ပါ။ စိတ်အတွင်း သန္တာန်မာ တက်လှာရေ ကဗျာအဆိပ်ကို ဖြယ်လို့မနိုင်ဖြစ်ပါ လတ်ပါရေ။ အရာတအုပ်လောက် ထုတ်အုံးမေဆိုရေ ကဗျာ အဆိပ်က တိုးအားတိပီးလှာပါရေလို့ ဆိုရမေဖြစ်ပါရေ။

နဂိုကပင် စိတ်ဆတ်သူတယောက်ဖြစ်တေ အကျွန်ရေ ဘောက်ဘက်သတ်ပနာ ထုတ်ဖို့အတွက် အစီအစဉ်ဆွဲပါရေ။ စာအုပ်ရာထုတ်ချင်ရေ ကိုယ်ကတခုလေး နံစွာကားမဟုတ်ပါ။ ယေနန့် တရွာတည်းနီဖူးရေ အစ်ကိုတယောက်ကိုလားပနာ တိုင်ပင်မှုပြုပါရေ။ သူရေ pagemaker layout လုပ်တတ်တေ အတွက် သဘောတူညီမှုရကေ အကျွန်ဆန္ဒပြည့်ဝဖို့ဖြစ်ပါရေ။ ပြည့်ဝယောင်လေး အကျွန်ကို ပါရမီဖြည့်ပီးပါရေ။

‘မင်းမာ ထုတ်ချင်ကေထုတ်၊ ငါမပြန်ခင် ဖြစ်ယောင်လုပ် ပီးခမေ’လို့ ဆိုပါရေ။ ယေနန့် အနုပညာဥယျာဉ်ထဲမာ က လောင်သွီးဖို့ ကဗျာအိမ်ကို ရှာဖွေပါရေ။ နှစ်ပေါင်းနှစ်ရာသုံး ဆယ်တိတိ အလင်းမွတ်အမှောင်ညည့်ကို လားတို့ပါရေ။ နှင်း တိအီးခဲနီရေ ညည့်ပြတင်းပေါက်မာ ပိုးစညိမ်းသျှေတကောင်နု အာရုံခြောက်ပါးက ဖြစ်တည်ပါလတ်စွာရေ ‘ခြပ်ရိုးတမျှင်နုအ လင်း’ရာ ဖြစ်ပါရေ။ ကိုယ့်အလင်းကို ကိုယ်ချဲ့လို့ကျည်းမ ဖြစ်ပါ။ ယေနန့် အားနည်းချက်၊ အားသာချက်တိ၊ ခြပ်ရိုးပီသ၊ မပီသမှု တိအတွက် စိတ်ရှည်လက်ရှည်နန့် အမှာစာရီးပီးကတ်တေ ဆရာခိုင်ထွီး၊ ဆရာခိုင်မင်းဇံ(ရခိုင်ပြည်)၊ ဆရာဇော်ထွန်းလင်း (ခ)ရက္ခိတသွီးရက္ခိတသား အပါအဝင် ဆရာသမားအားလုံးကို ကျေးဇူးတင်ပါရေ။ ပထမစာအုပ်ကပင် ဒုတိယစာအုပ်တိုင်

ယောင် pagemaker အစ pdf အဆုံး layout နည်းပညာပိုင်း
ကို အချိန်မအားရကြားက အားစိုက်ပြီးကေလုပ်ပီးရေ ဆရာ
နောင်ခိုင်ပြည်နန် မျက်နှာဖုံးဒီဇိုင်းရီးဆွဲပီးရေ ဆရာမြတ်ဌေး
(ပေါက်လေ)ကိုလေး အထူးကျေးဇူးတင်ပါယင့်။

အနာဂတ်ရခိုင်စာပီအတွက် ခြပ်ရိုးဖြိုပီးကတ်တေ ရခိုင်
စာပီချစ်သူ၊ ကဗျာချစ်သူရို့လက်မာ အနုပန်းတိ အဆက်ဆက်
ဝိဆာနိုင်ပါစီ။

သာစွလေ . . . ။

ဝံသ



ဝံပုလွီဆင်ပရိယာယ်ကြီး

အဆုံးထိနို့က်ကြည့်
 လပါးကခိုးယူရေ ရနံ့သစ်ကောင်းခင်နန့်
 ကျိုးပဲ့သိက္ခာတရားကိုဆက်ဆက်ဆောင်ယူလှာ
 ကျင့်သားရ လှပရိယာယ် မိစ္ဆာအားသခင်ရို့
 ပီတိတိ ဝှန်ကျလိုက်တေကားယေ . . . ။

အပြိုင်အဆိုင်စာရိတ္တ ချိုးဖောက်ခံကတ်ရ
 မဟာဒုဗ္ဗိက္ခကန္တရ အိုဇုန်းအလွှာထက်
 အကြားနန့်အမြင် ဗဟုနန့်သုတ လိင်ပြန်ကာမမာထိုးယစ်
 ပရိစ္ဆေဒ အာဟာရမပြည့်ဝ ငတ်မွတ်ခြင်းကြားမာ
 ဉာဏ်ရည်သွီး အတုခိုး အားကျ လိုက်စားမှုတိ
 များပြီးယင်းများပါလတ်တေကား ဉာဏ . . . ။

မျက်လွှာရိပ်ကို ထပ်မနှိတ်ပါကေ
အရိုးသားဆုံးဝန်ခံခြင်းဆိုစွာ
အနစ်ထိုင် မုသာဝါဒ သတိပဋ္ဌာန်လား

(မမြင်ချင်လေး မြင်လိုက်ကတ်ရပျာယေ)

မှီဝဲ ဆားမြည်းခွင့်မဟိရေ
အတောင်ကျွတ်ငှက်တကောင်နုခိုနားဖို့ ကိုင်းညှာတိစွာ
တဖြောက်ဖြောက်ကျိုးညွန့်နီကတ်တေအနိစ္စအကြည့်တပွင့်
လူမှန်းသူမှန်းမသိယောင်ကို ပြင်းထန်စီခရေကား . . . ။

ထားပါဖိလေ
ကိုယ့်အတောင် ကိုယ့်အထွာ အတတ်ဆန်းရေပင်ဆိုဆို
မနူးမနပ်အခွန့်ရှည်ရေပင် ပြောပြော
ပရိယာယ်မျက်ချိတ် ဝံပုလွီဆင်ပိုက်ကွင်းကို
ဝင်တိုးနီလိုက်ကတ်ပုံတိ

(အတိတ်ကိုလှန်ကြည့်ဖို့တော့ခါ လိုမေ)။ ။

ကမ္မပစ္စယကို သရုပ်ခွဲကြည့်ခြင်း

အနှစ်မချိနှိုင်းရေ သံသရာပစ္စက္ခ
အမီးပုတ္တသင်္ခါရပဟေဠိကိုတိုက်ထုတ်ယင်း
ဓမ္မတာဥဒ္ဓံထဲ လှသံစိုင့်ရို့ချိုမြခြင်းလွဲလားဖူးခ . . ။

အဖြည်မဟိရေ သမုဒယကပိုးဖောက်ရာတိများလို့
ဒွါရခြောက်ပါးချို့တဲ့ပါလတ်တေနောက်
ကိုးဆယ့်ခြောက်ပါးရို့လှုပ်ရွန်းကြားနီတတ်ပျာ . . ။

အညှက်တစကထွက်တေတဝီဝီအခိုးငွို
ပြင်းယှယှအဆိပ်အတောက်အဖြစ်အမတေနီရာယူ
မယှင်းမလင်းနောက်ပြန်လှည့်လားဖို့
အနီး အဝီး အပါးက တိုးအားတိ
မျက်မမြင်ဒုက္ခိတအထာနန် . . ။

ဆောက်တည်မရခြင်းဝင်္ဂပါတောနက်မာ
ကမ္မပစ္စယကိုသရုပ်ခွဲကြည့်ကေ
ဗဟိဒ္ဓသံယောဇန
အကုသလကမ္မပထတိနန်
လီးကျောက်နီကတ်တုန်းသီး . . . ။ ။

ညင်္ဂီရာခွက်ထဲကတည်ကမ္ဘာ

တရိပ်ရိပ်တိခနဲပြတ်ပိုင်းလား မထင်အနိစ္စကြား
အချိုတခွက် အပေါ့တခွက်အချိုးကျကျဖျိုစပ်
ဒုဂ္ဂတိဘုံထက်က အမှန်တရားစစ်စစ်အတွက်လတ်
မူးမှိုင်းလဲချော်ထားရေ သက်ပြင်းရိုင်းရိုင်းတိ . . ။

အရှင်လတ်လတ်လုံးစုံကန်းရဖြစ်စိုင့်တော်ထဲ
မလီးမပင် အချိန်မှန်မှန်ထတွန်နီသူတယောက်နု
မပျက်မကွက် အလားမှန်ရာနှုန်းပြည့်ခရီးမာ
နည်းမျိုးစုံအယုံသွင်းလှည့်စားခြင်းက
ရွက်ကျင်တိတသုတ်ပြီးတသုတ်
စီးမျိုးလားစီရေထိ . . ။

မိုးသောက်ဖက်များစွာယုံကြည်ရာအလင်းတန်းခါး
အထပ်ထပ်ပွင့်အာကျဖို့
လှုပ်ကိုင်ခါနွိုးကံကိုလက်တည့်စမ်းမိသရွှိ
မပီပြင်စောဒကတိကရာအထွီးပြတ်နန့်
ရည်သံသရာ အထပ်ထပ်တိုးလှာ အဂင့်အထပ်ထပ်။

ပင်လယ်အူရေညည့်က
တခြမ်းပဲ့ထက်ကကြယ်ပြောက်တိ
အမာရွက်တန်းလန်းနန့်ငတ်မွတ်မှုကိုမျိုချ
အလင်းမတောက်တေကမ္ဘာအတွက်
ရဲရင့်မှုကိုဝဠာကိုယ်စီမာတင်ထွန်း
ယေကေလေး . . .

ညက လကို မပန်ဆင်နှိုင်းသီးစွာ အံ့ရေ ။ ။



ဘူတာနံပါတ်-၃၁

လက်ညှိုးမထိုးလိုက်ပါကော

စီနီယာအရာဆိုကော

ဇာ မီးစိမ်းညိုဝါတိကလေး ရပ်နားခွင့်မပြု

ခါးဝတ်ဒယောတပိုင်းနဲ့ ဝတ္တရားမိုက်မဲ့မှုရှိတော်အပါး

အဆုံးထိတွန့်ခေါက်မှော်ဝင်နီရေ ဓားပါးပါးသျှောတချောင်း

ဖဲ့ကိုက်ကြွက်သားလိုက် ဖိုဝင်မှုအစွမ်းသတ္တိနန့်ဝီးလို့ . . ။

နွားချီးတစက်စိမ့်ဝင်ခြင်းက ပုတ်မကောင်းမှုကိုဦးတည်
 စိခြပ် ဖာသားလိုက်နီရေ
 မှင်စိုဖယောင်းစူးအပ်မပြတ်သားမှုက
 နားအီးပါးအီး တွေးခေါ် စနစ်ကျ ပါးနပ်မှုတိ
 မြောက်စား ပီးကမ်း အသပြာတစနောက်မာ
 ပုန်းလို့ ကွယ်လို့ . . ။

ရေဒီယမ်သတ္တုကြွနီရေမျက်နှာထဲ
 အတ္တအမြစ်တွယ် မနာလိုခြင်းနှိုးစက်များ
 ကျားတကောင်ပိုင်လေး ချောင်းဖူး
 များတချောင်းပိုင်လေး ကျင့်ဖူး
 မြွေတကောင်ပိုင်လေး တွန့်လူး
 မြစ်တစင်းပမာလေး စီးကြမ်းကတ်လီရေ . . ။

နိစွဲ လွဲတပ်ခံရသကြင်တခု
 စကားမပြောဖြစ်တေ ပျိုရက်ရာဇာအချို့
 နားဖောက်မအားရေ အမှန်တရားစစ်စစ်တိအတွက်
 ဘူတာနံပါတ်-၃၁ အရောက်
 သမိုင်းလက်သည်ခံတိ ယှုပ်ယှက်ကိုခတ်လို့ . . ။ ။

မိုးရိပ်တခဲနန့်မာတိကာ

ယေ ပပါးသျှေနန့်တလွှာချင်းတိုက်စားလှာရေ
 မှန်ပြာပြယ်ဆင်း နိဒြိရာဆိုင်းဆိုင်းတိ
 ပွင့်ဟလက်ကျန်ကြွင်းနက္ခတ်မနုဿဒိုင်ယာရီထဲ
 လတ်လတ်ဆတ်ဆတ်ကိုကြိုလို့ . . ။

တယောတလက်ရှည်လျားတီးခေါက်သံထဲ
 အဓိပ္ပာယ်တခုချင်းစီနုပရလောကီချမ်းသာရို့
 သုံးရွှမ်းတင်ကွဲလို့ဏ်ခေါင်း လှမ်းကျွံသံဝေဂကြားမာ
 တုံ့ကျိဘာဝေကားယေ . . ။

ရုပ် နာမ်နှစ်ပါး ဂေါင်းချဦးတိုက် သန့်ပြန့်ဝတ်ဆံရို့
 အကင်းပါး နှင်းသံစိုင့်တေးတပုဒ် တီးခတ်ဖို့ကြိုးစား
 ရွတ်ခနဲထွက်ကျရ လီဓာတ်စုတ်ချက်တိုင်းမာ
 အသစ်ဖန်ဆင်းသျှင်သန္ဓေသားရို့ညှိန့်စွဲသီဆုံးယင်း
 ဗလာရင်ဘတ်နန့် နီဝင်နီဂုံးချုပ်လားရစီရေ . . ။

စေတန့်ရို့ကစပ်ထားရေအကြံအဖန်ထဲ
 အကန်းစမ်းတွားသူရို့ ဆောက်ပြိုကြွင်းကျန်တိနု
 မာတိကာထဲပြုစုထား မိုးရိပ်တခဲအကြောင်း
 ဖွင့်ဖတ်ကြည့်ကေ
 နောင်တခြီရာ လက်ရာတိဂျည်း ဗျာများနီစွာမနား . . ။ ။

ပုံသီတခု အက်ကွဲအမိပ္ပာယ်

ဟောင်းစက္ကန့်ပျိုရို့ဆည်းဆာကိုအလှဆင်
ပကတိဖန်သားထက်ကသမုဒယဆက်နွယ်မှု
မိုးသားအပြို အယိုတိဖြစ်လို့ . . . ။

နင်
ထားခရေကတိစကား
စည်းရွတ်ဝါးရွတ်နှိုင်းလွန်းမှုမာ
တချက်တချက်ယှိုက်ငင်မှုရုပ်ကြွရုပ်လုံးတိ
မျက်ရည်စမ်းရို့ဖူးပွင့်ကတ်တေရာသီ . . . ။

ပစ်မှတ်တည့်မြားတစင်း
ဦးတည်ချက်လွဲလားရေနောက်
ရင်ကွဲပက်လက် ရွင့်လိပ်ပြာခိုနားကင်းရလို့ရာတခု

ချစ်သူ . . .
စုံကန်ထွက်လားခရင်ခွင်တစုံစွာ
ဂုတော့ခါ
အနွမ်းပန်းတိဖူးပွင့်နီကတ်ယင့် . . . ။ ။

ပစ္စက္ခဝဠာပြင်က နို့သရုပ်ပြကွက်များ

ကြည့် . . .

ကိုယ့်အရိပ်ကို ကိုယ်ခိုလှုံဖို့
 ငါ့ကိုငါတော်လှန်ယင်း အိမ်ပြန်လမ်းတိစီးသထက်စီး
 ညှစ်ထုတ်ရခက် ရီခဲရိုင်းတိတောင် အခါခါလူးကျ
 ရနံ့မသင်း အာရုံလွန်ပြက်လုံးတိကြားမာ
 ကုလားပြန်ခေါက်ချိုး ရသကို သုညစားရေ
 ဂျီကာပယေ . . ။

အိန်ဂျိန်တလုံးချွတ်ယွင်းခြင်းလည်ပတ်မှု
 အရိတရွားကုပ်ခြစ်ရာ နာမ်အစာအိမ်မာ
 ဒုက္ခငြိမ်သက် အလင်းအက္ခရာပါးပါးတချပ်
 နှင်းမသောက်တေ ခြပ်မဲ့နို့သရုပ် အတ္တကုန်စျိုးမြင့်ပွဲထဲ
 ညှိရခက်တန်ဖိုးတိ နိပယောဂကိုငှားဝတ်လို့
 အပြုံးဧည့်ဝတ်တိနန့်လွဲလားဖူးခ . . . ။

ဂြိုဟ်မာယာမဟာဘုတ်တွက်ချက်အရ
 ဖက်ယားကို စူးမှားဝင်ဖို့ဂျည်းလိုက်တေခရီးမာ
 ဇာတာပြုလျှပ်နွယ်မိုးရိပ်ပန်းတိ မြစ်အတိုင်းစီးဆင်း
 သက်ရောက်ကံတရားက ဘင်္ဂကိုလက်တို့ခစွာ
 နာရေ နာရေ . . ။



ဆန္ဒတင်းတိမ်ခြင်း ထိုအလို ဒေအလိုငှာ
 ခေတ်ပျက်ရထားဥဩဆွဲသံထဲ
 ရုပ်တခြားကိုယ်တခြားနန့်
 အမောဟကြားက စိတ်စေတသိက်ရို့
 တခမ်းတနားလရောင်ကို ဦးမခိုက်နှိုင်းသီးရေ
 အာရက္ခဝဠာပြင်က တောပုန်းသတ္တဝါတကောင်စွာ
 ငါယေ . . . ။ ။



ဖိလုံဆိုဖိ

တဆတ်ဆတ်နန့်နိမ့်ဝင်ပါလတ်တေ
 ဆောင်းနှောင်းလွန်ခရီးဦးကြိုသူချင်း
 အနိုင်လိုအသာစီးရစီဖို့
 ဗီဇထဲ ဖြည့်သိပ်လောင်းထည့်
 အတ္တက
 ရှည်ထွက်ပါလတ်တေ နှစ်ပင်လိမ်အစွယ်တိ . .

လမ်းထွင်ယင်း လမ်းပျောက်ကတ်အနာသည်ရို့ခမျာ
 သွီးမတိတ်တေ အရိပ်စီးခြောက်လှန့်ခြင်းထဲ
 ကြယ်သဘင်ညနု ရောင်စုံပြပွဲကို
 ကွဲ ပြု အလိစီထိုးခြင်းကရာ တက်ရောက်ခရေလတ် . .

သွားကြားကထွက်တေ ခများများလီစိမ်းမာ
 အပြုသဘောမဆန်ရေ အသက်ယူမှားမှုတိပါရေ
 တသုတ်ပြီးတသုတ် ရောပွန်းကြီမွရ မာတိကာတအုပ်
 ပရိယာယ်အကျယ်ကို စာလုံးပေါင်းမမှားကေ ကောင်းဖို့
 လက်သည်းခွံထက်က မတူညီကွဲပြားခြင်းအနုမာနကို
 နှိုက်ချွတ်ဆီးကြောတတ်ဖို့တော့ကေ လိုရေ . .

လီ ရီ မြီ ပြဒါးခံသံဒဏ်တိ
 ရှီအိုရောင်အရုဏ်ကိုမျက်နှာသစ်
 ခက်ဆစ်ဖွင့်ဝင်ရိုးကို ဂလိုဘယ်ဆန်ဆန်ကြီညက်ဖို့
 အိန်းစတိန်းကိုသိဖို့လိုရေ
 အရေ့စတိုတယ်နုယုတ္တိပေဒလိုရေ
 ပလေတိုပိုင်တွေးခေါ်မှုမျိုးလိုရေ
 လိုရေ . .

ဦးကျောက်တစုံပါးက သိမှုပေဒတခုချင်း
 အံဝင် ဂွင်ကျ ဆန်ခါတင်တန်းသုံးတိုက်ဖို့အတွက်
 ဖိလိုဆိုဖိကို အသင်ရို့ ကိုးကွယ်တတ်ဖို့လိုမေ . . ။ ။

ကြယ်သဘင်မှားည

မတန်ချိချွတ် အရောင်းတင်သရော်စာခများများကြားက
အထမြောက်ကံရို့စုတေမ္ဗီးဖွားပါလတ်တေ
ခြုပ်မလျှာအိမ်ပြန်တက်တေ စီးရာဟုခံတွင်းမာလတ် . . ။

အသည်းရောင်အသားဝါ အော့နာဝမ်းကျလိုက်နီရ
ဒေဥပါဒန်မျဉ်းပြောင့် မျဉ်းကောက်ကောက်ထက်
သကြဇ်ဆိုးညကို သင့် ဆန် ကူးခတ်ယင်း
လီဖြတ်ခံ ကိုယ်တခြမ်းရင့်ကျက်မှု အတက်လှီကားတိ
အရီချုပ်ပင်လီပင်စွပ် ကစပ်ကွက်ကိန်းသီတခုထဲ
အရူးလုပ်ပေါင်းခံရခြင်းလေးမနည်းပျာ . . ။

ဖဖူးရောင် ဇလောက်အကျအယှုံးလက်သံပြောင်ခြင်းထဲ
နံပါတ်စိုင်ရွတ်ကျ အစမှားကြင်းခြီလှမ်းနန့်
အရိုးများများသစွာတရားကို အကြိုက်တွံမီးညှီသောက်ယင်း
အိပ်မက်အနွမ်းအဖတ်တိကို ရှီရောင်ဆမ်း
အချောသတ်ဖိသိပ်
အောက်စရွတ် အတိတ်ကောင်း နိမိတ်ကောင်းအတွက်လား
ဖွဲရာကျမှုတိ ခြီသွက်လိုက်တေပင် . . ။

ကျင့်ဝတ်တဆင်စာခြံခတ်ခွင့်ပီးပါ
ညွန့်စိုက်တိန်မြုပ် ဟောင်းသမိုင်းတောက်ပလှာလိမေ

အဆုံးထိတွက်ကြည့်ကေ . . .
ဇာကံတရားဖြူဖြူရို့ကလေး ယှီးဖဲတချပ်ပိုင်
နမ်းယှိုက်ခွင့်မပြု

အပ်တိုတချောင်း သံတိုတစ
ဝီရိယပေါဆချက်နောက်ကြည့်မှန်တချပ်မာ
ပြန် ပြန် ခလုံးသတ်လဲနီယင့် . . ။

တကွက်ရွှေတိုင်း ‘အသင်’ရို့အတွက်ရာဖြစ်တေ
လက်ပွန်းတသိ နှုတ်ကျံအက္ခရာမီးပုံကြီးထက်
ဖွပ်စင်ပြောင်လဲ့ ဆူပါနီဗရို့
ရှက်တကွန်သျှေသည်းခြီတိ
သွန်းလုပ် ရွှင်ပါးနီရတုန်း . . ။

ခြပ်ရိုးပြီဂန္ထဝင်
ကိုယ့်အဖို့နန်ကို လောင်ကျွမ်းရဖြစ်စိုင့်တော်နွ
အဆုံးသတ်ခွင့်မရရေ ဇာတ်လမ်း
ဝေဒနာနိ ပယောဂခါးသီးခြင်းကြား
နိဂုံးမလှ ဇာတ်ဝင်ခန်းအဖြစ်နန်
လူဖြစ်ရခွင့် အယှုံးကြီးယှုံးရေ ၁၀ . . ။

နိစိုင့်မှတ်တမ်းတိကို
မိုးတပြက် နီတပြက်မာ ထုတ်လှမ်း
အကွက်ချောင်းဥတုရို့က တရွားရွားနန်
ပြန် ပြန် အဖတ်ဆယ်လို့ကိုမရ . . ။

ရက်စက်မှုတခါတရီဆိုကေလေး
အတွင်းကြီဝတ္ထုရို့ခမာ
ကမ်းမမြင် လမ်းမတို့ နလန်မထူနှိုင်းရေကြား
ဂေါင်းပုံပိုင်းတတ်တေ အမိုက်ညည့်တိ
များလိုက်တေဖြစ်ခြင်း . . ။

တစုံတခုသော ကိုယ်စီဘေးထွက်ကောင်းကျိုးတိ
 ဒေပိုင်ဂျည်း မှောင်မိုက်စွာဆိတ်သုဉ်းရဖို့လား
 ဂေါင်းချင်းစပ်အဓိပ္ပာယ်ကိုလိုက်နှိုးယင်း
 အလန့်တကြားကျပျောက်ရ အိပ်မက်
 ခြုပ်ရိုးပြိုကွဲဝင်နှလုံးသားတိအတွက်
 အရိုင်းဆန်သည်တိကရာ ဘဝင်တခိုက်ခိုက်နန့် . . . ။ ။

လူ့သမိုင်း

ငါ ဆိုရေ အတ္တနာမ်စားတခု
 ကျွန်စိတ်ပေါက်လို့
 ကျွန်ပါးဝလှာစွာမာ
 အာရက္ခသမိုင်းလေး
 ဒဏ္ဍာရီဆန်ခရလီပျာမနား။ ။

သင်္ကေတတခု တွက်ခြံ

မစခင်ကပင် ပြို ကွဲ နီကျလား
တဦးတယောက်နု အလိုပြည့်ခြင်းကို
အလွန်အကျွံ တန်းဆာဆင်မရိုးသားမှုတိ
တန်းတူညီမျှခြင်းအတွက်လတ် . . ။

စီမံကွပ်ကဲအနှစ်သာရထဲ
ဂလုံခံလှိုက်စား အာယတအငြိုးများ
ပက်ခုံးထက် ပြီးလွှားကျော်တက်
တနီ တရက် တသက် ရက်စက်ကြမ်းခြော်မှုတိ

အမှန်တရားကိုက မိတ်ဖွဲ့ဖို့ ခက်ရစီရေလား
ရာသီအိုအမှောင်ပွဲဖို့အတွက်
အသုံးတော်ခံ ကံ ဉာဏ်ဝီရိယရို့
သမိုင်းပတ်စာတင် သဘင်ညမာ
ရင်ချင်းဆက်ထားရေကကြိုး
အငိုဖက်ကလျည်း သရုပ်ဆောင်နီရရေလို့ . . ။

ယူကျုံးမရကြီကွဲမှုအလယ်
အကုသိုလ်လမ်းမှား ဆိုးနုကွတ်ကြားမာ
လောကနိယာမကို ဘာသာပြန်ဖို့ခက်နီသရွှိ
ရသမမြောက်တေ တွက်ခြံတိကရာ
လူရာဝင်စီခရေလတ် . . ။ ။



ရာသီကြိုမျက်ဝန်းထက်က ကဝေပျိုအနမ်း

အမှန်ဆို

နာရီဟောင်းထဲကူးခတ်ရဖို့ ထင်မှတ်မထားခ

ယင်းပိုင်နန့် . .

နီတစင်းကိုမျိုလားရေစကြာဝဠာကြီးထဲမှာ

ညကိုအဖော်လုပ်တေဦးကျောက်တခြမ်း

ပိုင်တခွက်နန့် ဆီးပြင်းတလိပ် ကိုယ်ငွိုကို တပ်မက်ယင်း

သက်ပြင်းတိ ဘဝထဲက ဘဝကိုငှားဝတ်နီတတ်ပျာ . . ။

ဝတ်မုံရိုးကြချပစ်တေ ကုန်းခေါင်မြင့်မား
 အသွင်စိမ်းတောအုပ်
 လက်သည်ပေါ်နှောင်ဖွဲ့မှုကြား အဖျားတက်နစ်မြုပ်လို့
 ဆက်ဆံရီးနယ်ပယ် ကုန်စီးနှုန်းကို အလိုက်တသိပြုံးရယ်ပြဖို့
 အရာအားလုံးနုနုစိတ်ပန်းချီတချပ်က
 တခမ်းတနားကို မဟိ အဂင့်မဟိ . . . ။

ထွန်ယက်တေခါတော့ကေ နီတစင်းစာပင်ဖြစ်ဖြစ်
 မြို့ပြတိုက်တခုလုံး မောင်းနှင်ချီလှာရေ
 အိပ်မက်ချီချီပင်ဖြစ်ဖြစ်
 ဖွဲ့တည်ခအာဝါသမျှော်လင့်ခြင်းတိ
 ဗရဗရီဖြစ်ခစီရေလား . . . ။

နံရိုးမဲ့ချစ်ခြင်းနု အသစ် အသစ် သက်ဟိ သက်မဲ့တန်ဖိုးတိ
 နီရောင်ပျောက်ဆည်းဆာအိုထဲ ပျို့အန်အဆိပ်တက်
 ခြားနားပရိုဂရမ်ရို့ တိမ်းစောင်းလား
 ကဝေပျို့အနမ်းတစက်က
 ဘဝကိုယ်ပွားမိတ္တူတိ အဂင့်အဂင့်ကို
 အဂင့်ကိုယားရေ . . . ။ ။

အနန္တထဲက အကျွန်ုပ်သခင်

အရောင်မဲ့ညစ်ညစ်ကောင်းခင်တလက်

ဆိုးဥတုကိုလက်ယပ်ခေါ်လိုက်တေ

ယင်းအထဲ

ခရမ်းလွန်ရောင်ခြည်တိပါရေ

အီဗိုလာဇီဝိန်မြွဲလက်နက်တိပါရေ

သောကပရိဒေဝ ရက်စက်ကြမ်းကြုတ်မှုတိပါရေ

ပါရေ ပါရေ . . ။

ယင်းကာလသုံးပါးကိုရင်ဘောင်တန်း

အာဝေဏိကလောင်ကျွမ်းမှုတိကြားမာ

ရတနာခုနစ်ပါးနဲ့ အမြင့်မြတ်ဆုံးသောရတနာကို

ရွှီလိုရာ ရွှီဖြစ်စိတ်တေ

အနှိုင်းမဲ့ထာဝရသခင်ဆိုစွာ

သူမှတပါး . . ။ ။

လောကကိုများရေ သီးကြို့တစင်းအကြောင်း

ဆတ်ခနဲ
ထိုးသွင်းလိုက်တေ ဓား
ဆိုးချင်းမဖောက် ဆိုကေလေး . . .
ခွဲစိတ်မကုသဖြစ်တေ ဒဏ်ရာက စကားထပြောရေ
အနာဂတ်ဆိုစွာ ပြတိုက်ထဲမာလားလတ် . .။

သောက်သုံးရများလှာရေ ချဉ်ငန်ဖန်ခါးဝိသေသ
အသက်လူဥတုကြား အရည်ရွှမ်းဥပေက္ခာတိ
ခရေစီအဖြစ် ဘက်လိုက်မှုကိုလက်ယပ်ခေါ်
ရာစုတိအထပ်ထပ်ခွာချထားသကြွန်
ခြစ်ရာကြောင်းရာတိ များလွန်းပါလတ်တေ . .။

အလင်းငတ်ပူလောင်မှုကိုနားချဖို့
မလိုလားအပ်တေ ဥပမာ ဥပမေယျတိ
ကျမ်းကိုးစာရင်းထဲ လူ့ရာဝင်လားရေအဖြစ်
သမိုင်းကို ကြိုးတွဲချနီကတ်စွာတောင်
တဖြောင်းဖြောင်းနုနုလက်သံကိုညံ့လို့ . .။

အထူအပါးနားလည်မှုတိ လွဲမှား
ဇာတ်တူချင်း အမှန်ပင် သင်းကွပ်နဖားထိုး
အလျော့ပီးစတမ်းမဟိရ မှောင်အာကာမာ
များမိခ အသိတဆင်စာ ပကတိအိပ်မက်ထဲ
ငသံဒေပိုင်လူသားတိ
များလေး များလှာနှိုင်းကတ်တေကား . . .။ ။

နှင်းဖြစ်ခွင့်မဟိရေ အရိပ်စီးသံသရာ

အမဲရောင်ဖက်ကိုအကူးမမှားကေကောင်းဖို့
 ခြံပြင်းနှင့်လှာရေ အတ္တဆင်မိုးရိပ်လှိုင်းတွန့်တိ
 ဇင်းခါထက် ငန်ပျာပျာပဋိသန္ဓေကို တူးဆွ
 အမြစ်ပြတ်နှစ်ထပ်ကွင်း
 ငေးမှိုင့်ယှိုက်သံရို့အထူးတန်းဝင်လားစွာ
 ကမ္ဘာကတောင်သိယဉ် . . ။

သုခဘုံပျောက် ဆားတို့ခံလိုက်ရ သတ္တဝါရို့ခမျာ
 မရဏကိုအကြိမ်ကြိမ်ဝန်ချ
 လောကပါလရို့မနာလိုမုန်းတီးခြင်းလေးခံရ
 မသောက်ချင်ပဲ မျိုချလိုက်ရ အာပေါဓာတ်မာ
 ပထဝီကိုစွန့်ခွာခိုင်း များခေါ်ဝိညဉ့်တိအတွက်
 ထိခြင်းငါးပါးနန့် လုံလောက်မှုမဟိခစွာ
 အဖန်တရာကြိုကွဲရလီပျာ သောက . . ။



ကန္တာရနှစ်များစွာ ဝိပါကလူလားမြောက်ခြင်းထဲ
 တခါစား ညှိနှိုင်းစေတနာအသိုးကို ကုန္ဒြေဝတ်ပြု
 မျက်နှာဖုံးအတုနန့်
 ဂုဏ်သရေဟိဟိဝဲချလိုက်တေမသဒ္ဓါရီစာထဲ
 အရိပ်စီးလန်ဖြန့်မှုတိပါရေ
 စမျှိုခံသွီးစုပ်မှုတိပါရေ
 မသန်ထီစရာထဲက မသန်ထီရာရို့လေးပါရေ
 အမှန်ပင်ဆိုနင်းရလီပျာ အသျှင် . . ။

တောသျှင် တောင်သျှင် နဒီသျှင်ရို့
 အလိုက်တသိ သဘာဝလွန်ဆွဲခြင်းထဲ
 ဒေလူသားရို့အမြင်စက္ခုမာသံရည်ပူလောင်း
 ကာလယန္တယား တရိပ်ရိပ်မွားစားခံမှုမာ
 အကန်းက အကန်းကို ကျစ်ထုတ်လိုက် မန်းမှုတ်ရစီရေလား
 အော် သောက ဒေါမနဿ ပရိဒေဝမီးကို
 မလှုံတတ်မှန်းသိယင့်နန့်
 မသန်မစွမ်း လေးဖက်ထောက်ရို့
 ကုန်းကောက်စရာမဟိယောင် ဖိုပီးလိုက်တေ ဒေဂျူလိုင်မာ
 ငါ့နာမ်စားတိ ငါ့ဖြစ်ခွင့်မရ မရ မရစွာ
 အရာလေး ဒေအရိပ်ကို
 ခိုလှုံချင်ကတ်သီးရေလို့ဆိုကေ . . . ။ ။



ဖယ်ခွာမရေရ အရီခွံ

ဒေဂြိုဟ်စွာ ပါပဂြိုဟ်
ဟုတ်တေ . . .

ဒေ ပွားမျိုးဆက် အညွန့်တုံးဆိတ်သုဉ်းရာ
ပေါင်းကူးဆက် သီမင်းကိုချစ်ရည်လူးရေ ဂြိုဟ်
တယူသန်မစ္ဆရိယနန့် အလွမ်းကိုသင့်လို့ . . ။

ပျာယာခတ်ကနဦးနိဒါန်းအစကပင်
ဖဝါးလက်မှားထမ်းဖို့ ပါရမီအရင့်အမာတိလား
အခိုင်အမာ အဖျားဆွတ်သိမ်ငယ်မှုအထွီးပြုတ်နန့်
ဆောင်းပစ်ခွာမုန်း ကန္တာရနီရင်ပြင်က
အရောင်မွဲနှင်းပန်းတီ
ညည့်ကိုအဖော်လုပ်
ဂေါင်းခုအိပ်တတ်လှာကတ်ပျာမနား . . ။

ရွတ်လပ်စွာ ထွက်ခွာခွင့်ပြုပါ
 မရမက တိုး ချိတ် တက် ယှားကြီးရို့က
 ပတိုးတလှုပ်လှုပ်နုနုဝင့်ကြား
 အထိုင်ကျ မောနင်းတပတ်နု ဇာတာကံလှလှကို
 နက်ဖန် သန်ဖက် အမှောင်ပွဲဖို့
 ကံကြမ္မာခါးခါးရို့မာထိုးကျေး
 လီချွန်မပျက် တလွဲကျစ်ပပေါင်းဝှန်မာယာတိကရာ
 အနိုင်ယူ အသာစီးရစီခရေကား မာန

ပင်ပန်းလွန်းပါရေလေ
 ဆွဲထူရခက် မတင်မကျနုနု သက်ပြင်းအထပ်ထပ်
 သံသရာပတ်လုံးလန့်ဖြန့် စီးအရိပ်တိ ဖကားခွစီး
 ဒေတိန်းဆိတ်မှုတိ ဖောက်ခွင်းတောက်ပလှာဖို့
 ဘဝပလန်တိ
 သာမိုမိတာတချောင်းပိုင် ရဲဝံ့မပြတ်သားနှိုင်းရေ
 မျှော်လင့်ခြင်းအသီတိကရာ
 ယင်အံ့ ရရောင်းသတ်နီယင့် . . ။

ဝတ်ကျီတန်းကျီ တကိုယ်ရည်တကာယ
 သုညဆိုးစရိုက်ကလွဲလို့
 အနိုင်အယှားတွက်ချက်မျိုး နတ္ထိဗလာနယ်သားရို့တရွီ
 ကြီးမြီကျ သိုင်ခေါင်တစွက်နု ပိတ်လှောင် မှောင်မိုက်
 မိုးမလင်းခြင်းက
 နှံ့ခွာချခွင့် ကြိုးစားယင်း ဇရာနယ်တဖက်ကို တွန့် ပါး
 ဆိုးနီလီယင့်ယေ။ ။



ပယောဂလမ်းဆုံ

ပန်းချီဆရာတယောက်က
 တစက်သောဖယောင်းကိုပြုစား
 ညှို့ငင်သံတိပြင်းလွန်းခ ဘဝပုံရိပ်ယောင်တိစွာ
 လက်ရည်ဂွန်ပစ်မှတ်ခွင်းမြှားတစင်း မဟုတ်နိုင်ခ . . ။

လရောင်ကို တပ်မက် ယစ်မှုခ ပင်လယ်စာအိပ်မက်
 သီခြင်းတရားကို ဘာဝနာမပွားတတ်ကေကောင်းဖို့
 ရိုးအ လက်သမားရို့ သန္တာန်ဆောက်ခတ်ပညာက
 ဇာပုံစံမျိုးနန့် ပွဲတော်တင် ထွင်းခတ်နိုင်ခယာလေး . . ။

မီးနုနုမကစပ်ပါကေ့ . . .

ဝါသနာထုံးစံအရ

ငိုခြင်းဖွဲ့အာဝါသကို ကံတဆုပ်စာနုနုပသလှာကတ်

တို့ ရှည် သီးပင်အချို့ငန်ပြာပြာဗီဇနုနု အတက်အဆင်း

အဆင်းအတက်

ရဲရင့်တတ်နိုင်စွမ်းခပျာမနား . . . ။

အစွဲကိုယ်စီ သီချာမှုအရုဏ်တိ မျက်နှာမသစ်နိုင်သိပါလေ

အကျဉ်းချ ဝတီသျှင်မရို့ခန္ဓာထဲ နားမဟိသော

နားတစုံအတွက်

ဖဝါးမဟိသော ဖနပ်တရံအတွက်

အပ် နဖားဆိုးနားဋောင်းကို အလိုက်တသိဆက်ဆံယင်း

ဇရာအရီတိ တွန့်လိမ်မှိုင်းကပ်လှာရစ္စာပင်

ဘဝနီထိုင်နည်းတခုလား . . . ။

ပိုလို့သာလှောင်ပိတ် ဖုံးအုပ်ခရလီပျာ

ပုံသီနည်းလမ်း လေးဂွင်နင်းသိမ်ဖျင်း ဇိမ်ခံမှုကြားမာ

ကျစ်ကျစ်လစ်လစ် စည်းမနှိုင်းကတ်စွာက

ကြီးမားလိုအင်တခု

ပက်ခုံးချင်းထပ် ညှိမရ

နှစ်ဖက်ချွန်အစွယ်ရို့လက်ရာကိုမြောက်လို့

အနှစ်မဲ့သံသယစက္ကန့်ပျိုကိုနှိုးလို့ ခရီးဆက်နီလီကတ်စွာ

(ပျင်းရိသူ မလာရလတ်)။ ။

ဗလာနယ်တဖက်က (+) = (-)

နယူးတန်ပိုင်တွေးခေါ်မိပါလား
 မေတ္တာရပ်ခံချက်တိက ဣထောက်ခယနီကတ်တေ
 ရင့်သော နီညိုချိန် မရင့်သောနီညိုချိန် ယုတ္တိစေတန်ရို့နန့်
 နီးနီးဝီးဝီး
 မိုးလင်းဝါပက္ခဒိန်ရို့ လန့်နိုးဆိုးမြိ
 ဗြဟ္မာစိုရ်တရားကိုတောင် မိလို့ . . ။

ရို့မာ ဝါဒမိုင်းတိ တလိပ်လိပ်ထိုးတက်လှာရေ
 ကျားစစ်ဆင်ဦးကျောက်တစုံပါးက အနိုင်အယှုံး ရနိုးနိုးနန့်
 ဝတင်းပျက်ကတေတိုက် ရဲရင့်မှုကရာ
 စီးချင်းထိုးရိုင်သမ်တိပြင်းလို့
 ဝါကျတကြောင်း သရော်လှောင်ဝေါဟာရ
 ဟန်ပန်သတ္တိလား
 ကောင်းယင့် . . ။

နှုတ်ခွမ်းဆိုးဆီးတပူးနန့် ဝလုံးဝိုင်းဝိုင်းမရီးတတ်သူခေတ်
 အနတ္တမောင်းပြန် ဆွဲချက်လျင်မြန်သွက်လက်မှုမာ
 ညည့်အန်ဖတ်ထဲ လူးလို့မ့်ထ ကြိုးစား
 ဒေသမိုင်း ကောက်ကြောင်းပီသဖို့အတွက်လား . . ။

စိတ်ဆွဲဆောင်ရာမှာ အလင်းငတ်ပုံစံတူကြယ်ဖြူတိအဖို့
 အမြှုပ်တစ်စီစီ ရိုးခြစ် ဖတ်ခွင့်မရခ
 ထိုင်ခုံပျောက်လိုအပ်ချက်နုနု
 ဆင်းရဲလက်မှတ်တစောင်နုကမ်းပြိုမျက်ရည်တိ
 အဖော်လုပ်ကိုက်ထုတ်ယင်း
 အန္တိမလမ်းမာ လက်မထောင်ဆန္ဒရို့
 ရိုးသားစွာကျိုးပဲ့နီလီယင့် . . ။

တိုးချိမြောက်ပင့် ဂေါင်းစီးတပ်ဥပမာက
 အာမခံချက်ပီးနှိုင်ခလို့လား
 ညည့်အံဆွဲထဲ လှည့်ပတ်လျှောက်လှာရ ရိုးမခရဲသားရို့
 ဝိဘဇ္ဇမိုင်ခရို့စကုပ် ပါဝါများများတိုးလှာစွာကိုက
 သျှိန်ဒိုင်ရထား အာပတ်သင့်
 ရာဇဝတ်သားကောင်ဖြစ်ခရလီရေ . . ။

ကျောက်သားတည် ရိုးရာတခက်အစီအစိုင့်က
 instinct ထပ်ချိုးလှန် ဝှက်ဖဲတချပ် (ဟုတ်) မဟုတ်

လက်တွဲဆန် ဖရိုဖရဲ မူပျောက်လက္ခဏာတိများလို့
 တချို့ဆို ကိုယ့်ကိုကိုယ်တောင် စာလုံးပေါင်းတတ်ခလို့လား
 မသိ မသိ သူမသိ ငါမသိ မသိခြင်းများပါလတ်တေ
 ဘုံတခုနု နဖားအပ် ကန့်လန့်ဖြတ်မဟာဗျူဟာထဲ
 ကလန်ဒါတွက်ချက်က
 စို့အောင်းဖားတကောင်ဖြစ်ခဖို့ဆိုကေ . . ။ ။



ယုတ္တိမဆန်ခ အမောဖောက်ဖွဲများ

သတ္တိတဖက်နန့်၊ မွီးဖွားပါလတ်တေ
 အယစ်လွန်မရိုးသား မနာလိုမျက်စောင်းပစ်မှုများ
 အလားပေါက်ဗိုလ်ထလှာစွာပင်
 မသိခြင်းက ကိန်းဝပ်နီသီယင့် . . ။

တွန့်ခိုယိမ်းပါး နာမ်အမှောင်တဝက်နန့်
 အဓိပ္ပာယ်တခုထဲ ဆန္ဒနန့်ရက်လုပ် နီရောင်ခြည်အချို့
 ပိုင်းပြတ် ပြန်ဆက် ယုတ္တိအဆောင်အယောင်ပင်ဝီးလို့
 ကြမ္မာငင်ဆင်းရဲခြင်းတိ အသက်ဝင်နီယင့် . . ။

ဖြောင်းဆို
 ဒေအသံတခု
 မကြံကောင်း ကြံကောင်း ကျီနပ်မှုအပြည့်နုနု
 နောက်ကြည့်မှန်မပါသော ဝန်ခံခြင်းချိုင့်ခွက်က
 သမုဒ္ဒရာကို ငါတယောက်တည်း သောက်ပါရစီလတ် . . ။

သတင်းစာတစောင်ထဲထင်မြင်မှုသတင်းတပိုဒ်ပါလှာရေ
 မလတ်ဆတ်အပြုံးတိ မျက်နှာသစ်ပါ သွားတိုးပါ
 အပတ်စဉ် ကိုယ်လက်ဆီးကြောပါ
 အမျိုးသားရိုးကို ဂေါင်းဖြိုးပါ
 အူး . . အဆန်းအပြားမဟုတ်စွာတိက
 ငွီတန်ဖိုးကိုမဲ့စီရရေလို့ . . ။

အလီးအပေါ့ ရွှင်ထူခွင့်မရလောင်းတစီးတောင်မှ
 အတလိကျမ်းတပုဒ်နုနု သီမင်းကိုစိန်ခေါ်တတ်ခယာ
 နှစ်ပိုင်းကျိုးဥပါဒါန်ပါးနပ်မှုထဲက
 ရွက်သစ်လောင်းဖြောင့်ချက်
 ဆက်ခြံဆင်လက် အပျိုင်းထောင်အစွယ်တကားကားနုနု
 ဝါးလုံးခေါင်းထဲ ဝင်ထွက် ဝင်းပနှိုက်ကတ်တေထော . . ။

ဒုက္ခအိုလမ်းထက်က
 နီဆာလှူအဝတ်ပြန် ရိုးရာသျှင်မနု
 ပန်းနံသာကြိုင်လူး ပရမတ်လှလှတိကို
 သင် နမ်းဖူးချင်ရေပိုင်
 ငါလေးနမ်းဖူးချင်ခသင့် . . . ။ ။



နှစ်ပင်လိမ် ပြဇာတ်

အခန်းလေးခန်းပါသော ဇာတ်အိမ်တဆောင်ဖွဲ့စည်းပုံအရ
ဒိတ်လွန်ဟောင်းဓာတ်ပြားတချပ်ကို ဒွိဟကပြောရေ
သရုပ်ဆောင်မှုတိရိုးလွန်းပါရေလတ် . . ။

ပပါးချချပ်နိမ်းကျံ ရသတခွက်
ကြမ်းတချစာအဆင့်အတန်းနန့် တော်ဝင်ချင်သူရို့
ကြွက်တွန့်ဝင်ညတလုံးကို အရောင်တင်မန်းမှုတ်
မရဏပေကျံ အနားကွပ်စာရိတ္တကိုယ်အိမ်မာ
ဝိမုတ္တိကို ဇာလောက်ဆင်ပျင်ဖူးယာလေး . . ။

ကြယ်ရောင်တိမဲညစ်လွန်းပါရေ
 ကန္တာရရင်အုံက စိတ္တဇမိုးသားတိ
 နှစ်ခါပြန်မရ နောင်တအသိနန့်
 ကမ္ဘာကြီးကိုဆွဲခြင်ကြည့်ရေ
 တပွာလျော့သစ်ရိုးတိ များကများနန့် . . . ။

ကျောက်ဖြစ်စ တပတ်ပြီအူမတမြောင်း
 ဂန္ထဝင်စောင်းတန်းမာ ဆုပ်တရက်ဖြားနန့် လမ်းမှန်ကိုရွိုးလို့
 သံလိုက်မပါပဲ တောင်နန့်မြောက် ပြောင့်တန်းခလို့လား
 ယင်းပိုင်နန့်
 ပကာသနကိုထွက်ယက်
 မိုးခါးရီတပေါက်ကိုလေး ခုံမင်တတ်ခယာ . . . ။

မီးခိုး ပြာဖုံတောကို တရွှိရွှိကပ်လှာစွာကလွဲလို့
 ပရိယာယ်ဂြိုဟ်သွီး ငိုခြင်းဖွဲ့အတိတ်မိကံနန့်
 ပဌာန်းဆက်ရည်ရွယ်ချက် ခလုန်းသတ်မှောက်လဲ
 တပတ်ပြီးတပတ် တရစ်ပြီးတရစ်
 ဘေးဖယ်တွင်းလားအကြည့်တိ
 တယှင်းယှင်းထွန်းညှိတောက်ပလှာစွာပင်
 အားရကျီနပ်ကတ်တေလို့ . . . ။

ဥဒါန်းတွင် ဇာတ်အိမ်က ခွာနာကျမြင်းစစ်သည်ရို့
 ဉာဏ်ရည်ဖျို စည်းပြီယုံကြည်မှု ဦးဆောင်သရွှိ
 စည်းပြီယုံကြည်မှု တက်နင်းပစ်စွာကိုက
 ဂေါင်းပြတ်တုံး ကောက်ရိုးတမျှင်ကို
 အရာလေး ယီးဆွဲရလိမေ . . . ။ ။



‘ငါ’မသိလိုက်သော မရုဏလက်တကမ်း

ဦးစွာပထမ

ခိုင်လုံမှုသက်သိအထောက်အထားပါမလာခပါလေ။

ထောင့်ကျကျလမ်းနားက မျက်စိတချက်အနှိတ်

တသက်စာငြိမ်းအီးမှုအောင်ပါလေလတ်

ယှဉ်ထဲ

ငါ့ကိုငါ ကံစမ်းဝင်ထိုး

ထွက်ရက်တရက်မှာ အလုအယက် ယူတိုက်ကြည့်ရေ

ငါးလုံးတူ အကွရာလွဲလီယင့် . . ။

မသိလိုက် မသိဘာသာနန့်

အယင်နှစ်ကထက် တရစ်ရစ်တက်လှာရေ

အပေါင်ဆုံးနီစားတဝက်နန့် ခုထိုင်မိအရပ်ဒေသမှာ

သိမ်းဆည်းရမိ အနစ်ထိုင်မရေရာမှုကရာ

အတွင်းသိ အပြင်သိ မိတ်ဆွဲကိုဖြစ်လို့ . . ။

အိပ်စာရင်းတိုင်သန်းခေါင်စာရွက်က ဖျက်ရာခြစ်ရာများလို့
 နဂိုမူလအသား မျက်ရည်ဆွိုးဒုက္ခဝေဟင်မာ
 လီအဟုန်နန်းယိမ်းပါး
 နှင်းမဆောင်းနို့နု အကြိုပြုမိတ်ဖွဲ့မှုတိက
 အဂင့်ခါးပါရေ
 ဒေခွက်နန်း ဒေထမင်းကို ကန်တော့ပါယင့်လို့
 စွန့်ကြဲနိုင်ခကေ ကောင်းဖို့ . . . ။

သမုဒ္ဒရာက နီကိုမျိုချခါချ
 အကြားအာရုံထဲအထပ်ထပ် ပိုကျယ်လှာရခေါ်သံ
 တခွန်းပြန် တုံ့ပြန်မှု
 ချိုမင်္ဂလာတဖွန်းပင်တိုက်နှိုင်းစွမ်းမဟိခ
 အရိုးသားဆုံးပုံအောထိုးလိုက်ခါမှ
 အိုင်တီအမြင့်ဆုံး ညီးငိုသံကရာ သခင်အဖြစ်နန်း

ခေါ်သံ ကြားလား
 ခေါ်သံကြားလား
 တဂိုးခိုင်မဟုတ်စွာတော့ခါသီချာရေ . . . ။

ယင်းပိုင်နန်း ဘောင်းစောက်သစ်တပင်ပိုင်
 ဒူးမထောက် အယှုံးမပီး
 ဘဝင်မခြီတယူသန်နှစ်ထပ်ကွင်းနန်း
 မှောက်လှဲထား သုံးရွှမ်းတင် ဆီးတားမရခြင်းထဲ
 အသွင်းပီးမရ ငါ့လက်တကမ်းစာမာ
 သူရဲ့တိဆောင့်ခြောင်ထိုင် ချောင်းကြည့်နီစွာ
 ဧကန္တ ငါပင်အမိုက်မဲဆုံးလားဂု . . . ။ ။



ကောက်ကြောင်းပျို နိဒါန်း

အားလုံးကိုချုံ့ကြည့်ကေ
 အားလုံးလေး တခမ်းတနားကို လိုလားကတ်စွာရာ
 ဖြစ်တည်မှု အနက်ကျဉ်းအဖြည်တခုကို
 သံရှင်မြမြထက် နှိုးသွီးပီးလိုက်တေ
 ဉာဏ်ပူဇော်မခံတတ်သူရို့ အရင်းယျူးသဟဇာတမာ
 အနု အရင့် အနိမ့် အမြင့် လိုရင်းမရောက်
 ချိုးဆွတ်ခံအာယုတိ
 အမှောင်ဝပ်ပထဝီကို နမ်းယှိုက်ကတ်လီရေ . . ။

သဘောအရ ငုပ်လျှိုးလားရ အလင်းတမျှင်ဖြစ်လီပတ်စီ
 အတ္တကိုယ်စီမာ လူပီသချင်ခယင့်
 လက်ကျန်မိုးမျှော်ကိုင်းခြောက်တိ
 တသားမိုး တသီးလှချင်ကတ်စွာ အပြစ်လို့ဆိုကေ
 သတ္တဝါရို့ဝဠာကိုယ်စီက ရောင့်ရဲခြင်းဆိုစွာ
 ဇာအဘိဓာန်ကလေး မဖွင့်ဆိုဖူးသော လိမ်ဝါခြင်းတခု

လက်ရိုးမူတိ ဆင်းရဲခြင်းကိုခုံမင်တတ်ခယာ
 အညံ့စားပလတ်တီနမ်နန့် ပုံသွင်းရဝီရိယမှန်းချက်က
 တဇောက်ကန်းဒေါသကိုကီးညှိနှိုင်ခလို့လား
 အခန်းလပ်လိုအပ်ချက်နန့်
 နာဆာမာ လမ်းလျှောက်ချင်ကတ်တေလို့ . . ။

တခါကယေဓမ္မာ ဆယ်ဖြာဓမ္မသတ်တိ
 တဖက်ကံအငြိုး အကုသိုလ်ဆိုးကိုပွဲဖက်
 လောင်စာကုန်ဘုမ္မိ ပျားရည်ဆမ်းတလက်မမာ
 ချော်လဲယင်း
 တရွက်လှန်တန်ပြန်တိုက်မိုးသောက်ဖက်များစွာနန့်
 ကုန်းရီကျွတ် သောကကိုထမင်းစားဖိတ်တတ်ခယာ . . ။

ကိုယ့်အပူနန့်ကိုယ် ပျိုဆင်းခြောက်ခမ်းလှာကတ်ရ
 တွင်းဝက မိစ္ဆာနှင့်သက်ဦးဆံပိုင်ရို့
 ပီတိနန့်ဖသောက်ဆည်းဆာလှုံပြဿဒါးအရ
 တွန်သံချို ယုံကြည်မှု လောကျိတ်ရခက်လို့
 ဆောက်ပြိုအနာဂတ် အလျင်လို အီးခဲလှာစွာပင်
 တချက်သန်းပါးစနန့် သင်္ခါရကိုနှိပ်ကွပ်နီကတ်တေ . . ။

အစကောင်းလုပ်ရပ်က မစွန့်ဝံ့နိုင်ကတ်သိ
 ဖျစ်ညစ်ထုတ်ဖြစ်ချင်မူတိက
 ထင်သလောက်နက်ယှိုင်းမှုကိုမပီး
 အရင်းပြုဇောချွေး မျက်ဖြူဆိုက်ကောက်ကြောင်းမာ
 ဒဏ်ရာတိနန့်အိပ်တန်းတတ်နိုင်ကတ်ပျာမနား . . . ။ ။

ရင်ကစီးဆင်း ရတနာသိုက်နန့် ငါ့ဥယျာဉ်

စိမ်းစိုနှိုင်းကတ်စီလို့ . . .
 ကိုကောက် မဖြောင့်သောအချက်အလက်တိအဖို့
 အနုညှို့ဆုံးလက်ကထုဆတ်ပွင့်အာပစ်ခ
 ကြိုးစင်တင်အမှန်တရားစစ်စစ်အတွက်ပ . . . ။

လူသားဆန်ဆန်ယဉ်ကျေးမှုဇာစ်မြစ်ကိုက
 အပွီးဝင်မတင်မကျနန့် အခြင်းများဆုတ်ယုတ်လှာခ
 ကိုယ်စီမပြတ်သားမှုအတွက်
 အသွားတလက်မနန့် ဇောက်မနက်ပင်ဆိုဆို
 ဟောင်း လက်ကျန်ဝေါဟာရ အယဉ်သွင်းမြှင့်တင်ဖို့
 ငါ့ရင်ဘတ်ထဲမှာ ကဗျာတခက်ဟိရေ . . . ။

ဝီးကွာမှုတချက်သတိအလစ်
 သူ့ကျောင်းကိုယ့်ကျောင်းနန့်
 နောက်ဆုံးသူပြန်နဖားဆွဲလားရေပွဲ
 ဖမ်းဆုပ်မရ ပြင်ရွတ်လွတ်လပ်ရိုးကို အထင်အမြင်နန့်ပြော
 စွန့်စားတော့ခိုမှ အမျိုးသားရိုးပီသစီရေထင်ပ
 ယှဉ်တိအတွက်
 အဖျားမျစ်ကလောင်တချောင်းဟိရေ . . . ။

ပါးရေဖက်ပေါက်ထွက်ကတ်သူချင်း
 အစိမ်းဖုတ်သဂြိုဟ်လိုက်ရ ယာယီတိုင်းထွာခြင်းလောက်နန့်
 ဖြစ်တည်ရ ဗေဒလွန်ဥယျာဉ်က အနားပြတ်ခတ်ကွင်းတိ
 ဝမ်းမီးတဖိုနွိုးထွိုးနှိုင်းခလို့လား . . . ။

(တကြိမ်ဖူးသစ်မှုကို စစ်လားဆီးလား မပျင်ကတ်ပါကေ့)

တောက်ပမှုတိပြောက်သောက်မကြွိဖို့
အများဆိုင်နာမ်အထဲက ပုလဲငုပ်ကျွန်းမာ
ငါစွာ
အောင်စီဂျန်မပါရေ ဆာဒါးဟင်းချိုတခွက်ဖြစ်ချင်ရေ...။

ငြိစွန်းမှု ဆန်းသစ်စီချင် ဒေရင်ဘတ်ရွတ်ဖတ်သံမာ
အညွန့်ကျိုးရာစုထက် အထား အသို (အသို အထား)
ပိုင်ဆိုင်ခြင်းပြုလျှို့ဝှက်လောကဓာတ်အတွက်
သျှိန်ဒိုင်နုန်အစပျိုး ပခက်စင်ရာဇဝင်လူသားကို
ရင်ညောင်းရိုးရာဇုမလိအမှန် ဆီးစွမ်းတခွက်အဖြစ်
ဖော်စပ်တိုက်ဖူးခချင်လို့...။

တချို့က ပင်လယ်ဓားပြပေါရေလို့
သျှင် လူ အရောက်အပေါက် နည်းပါးလှာသော ကျွန်း
အနုသုခုမရို့အသက်ဝင်နိုးထပြောင်းလွဲမှုများသော ကျွန်း
မသိသူကျော်လား သိသူဖော်စား
အဖိုးတန်ရတနာအကျိတ်တည်သော ကျွန်း
မတရားဖိနှိပ် အာဏာသျှင်စနစ်ကို တော်လှန်ပစ်သော
ကျွန်း
သဘာဝဆိုးကျိုးကန္တာရကြားမာ ပကတိစိမ်းစိုနီသော ကျွန်း
ဒေကျွန်းမာတောင်ဖုံကျိုးငှက်ရို့
ရုန်းရင်းကြမ်းတမ်းပုံနွမ်းသဏ္ဍာန်တိ
လက်ညှိုးညွှန်းရာပင်...။

အလှတရားကို ဘဝနတ်သျှင်ထံပါးပသ
 အယပ်တွဲလိုက်ရ တခေါက်လား တခေါက်မပြန် အို နာ သီ
 ရိုးထက်
 ရွှီးချယ်မှုနိပါတ်ဇာတာအလိုက ဖယောင်းတစက်ကို
 ဒေဥယျာဉ်မှာ တည်ခင်းပသချင်ခရေ အကောင် . . ။

(ဆုံးယှုံးမှုတိ ဇာလောက်များယာလေး မမီးပါကေ့)

ဝါသနာစရိုက်အလိုက
 တလိမ့်ချင်းလှိုမ့်ဆင်းလှာရ အရာထင်းကျွန်ဖဝါးတောမာ
 ဇာတိပုည ဂုဏ်မာနကို မြီမြုပ်သဂြိုဟ်
 ခြံရာလက်ရာတိများလို့
 ဖုံတဆောင်းဆောင်းရွှင့် ရိုးပြတ်ဥယျာဉ်
 ခြောက်သွိုဆိတ်ခေါင်မှု
 တခါပြန်နုစိဖူးသစ်
 အာရက္ခသျှင်လူ အလီးထား နမ်းယှိုက်တတ်လှာယောင်ထိ
 ငါ့ဘာသာ ငါ့ဝဠာမာဖန်တီး
 ဒေ နှလုံးသွီးကိုဖောက်ထုတ်လမ်းခင်းခအုံးမေ
 လမ်းခင်းနီပါဖို့သိ . . . ။ ။

သတ္တမပါသော ဒုလ္လဘနာရီ

စွတ်စိုလိုက်တေပင်
 ထောင့်မတိုင်းသော နာရီအိုတလုံးထဲ
 နောက်ကျိ ဆွီးပင်လယ်ရီကိုခပ်အသောက်မာ
 အိမ်မောကျအိုးစင်းပဲ့ဝတ်ဆံ သောင်တင်ဒြပ်တိ
 တောက်လောင်ညှိုးရော်လှာကတ်ရ . . ။

ဒေါက်ဖြုတ်ခံကတ်ရ ထုတ် ယောက် ခြင်ကန်ရိုးစွာ
 အစိမ်းသက်တူရာသီမီးကို တိုးဝင် လှုပ် နှုတ်မရနန့်
 ဆုပ်လက်သီးဝေဒနာပြတင်းမာ မြက်ရိုင်းတိထူထပ်
 မှောက်မှား
 လဲချော်ထား သိုင်ခေါင်ခါးခါးကို
 အာဟာရလုပ်စားသုံးနီကတ်ယင့် . . ။

တဖဲ့ကိုက်သစ်သီး နတ်ဝှက်သီအိုရီထဲ
 အတောင်ပေါက်လောဘ ရက်ရောဆက်ဆံလိုက်ပုံ
 ဘင်းကျိကျဝင်ကြီးရိုးရိုးအနိစ္စကိုယှောင်လွဲနိုင်ကတ်တေ
 ပိုးသားနန့်ရက်လုပ် ဈာန်ဝင်နိတိ
 သူဆွဲ ကိုယ်ဆွဲ လွဲလို့ထော . . ။

ဘဝသျှင်မြတ်ဘုရား ဇာလောက်များများ
 မသီချာမှုနန့် ဝီးပါရစီ
 ဆိုကေလေး . .
 ဘရိတ်အုပ်မနှိုင်ခ အဓမ္မပုံသီကစပ်ကွက်ထဲ
 သတ္တမပါသော ဒုလ္လဘနာရီကို
 ဇာနီရောင်ခြည်တိက ပြုစားနှိုင်ခလို့လေး . . . ။ ။

ဘာဝနာမမြဲခ ရမ္မက်ကောင်းခင်

ငါစွာ တပတ်လျော့လီးပင်နီရေ လက်တံတချောင်း
 ကတ္တာမပါသောကြိယာတလုံးအတွက်
 ဧဝံနံရိုးပါးက ဖန်ဆင်းပီးလိုက်တေ မွီးဝတ်ရည်တိစွာ
 သိမ်မွေ့နုညံ့ အဖြူရောင်သံစိုင့်တိအဖို့
 တန်းဆာဆင်ရင်အိမ်တန်းခါးရွက်ကို
 ကုတ္တိယဝဠာပြင်မာထိုးအပ် ဖွင့်ချပစ်လိုက်တေ
 ကံ စိတ်ဥတုရို့ အလစ်ချောင်းပြိုသွီးနီစွာကိုကမမြင်
 နှလုံးခုန်နှုန်းတိ အလန်တကြားနန်
 နစ်မွန်းကူးခတ်လှာရသူ . . ။

နှလုံးကျဉ်းအယ်(လ်)ဘမ်တချပ်ပိုင်
 ယှိုက်ငင်မှုတိပိတ်ဆိုလွန်းပါရေ
 ဆားခတ်များ ပါးလွှာတလက်မ အပြီးလျင်မှုမာ
 တံဆိပ်ဂေါင်းပြောင်းတပ်ခံရ ရည်ရွယ်ချက်လိပ်စာတိ
 ဘောင်ဘက်သတ်ဒရဟောမျိုးရွှင့်နီရပျာ . . ။



တပင်လိမ် အရောင်တူမှုကွဲကိုမော်ဖူး
 သိုင်ခေါင်ကမ်းကိုဖြတ်အကူးမာ သံချောင်းခေါက်သံကို
 ငါမကြား
 ရှည်ဝင်ရိုးတချောင်း ပြန်ပြန်လည်ခြင်းက
 မေထုန်အပြုတိဖြစ်ထွန်းရေ
 ကုက္ကုဂတ ခြံခိုရစ်ပတ်ခြင်းထဲ
 အာဒိန်ရိုးတချောင်းက မျက်စိဖွင့် လမ်းပြပီးနှိုင်ခကေ

တနီက (ယစ်) ဆိုးရနံ့ ပေကျံစက္ကူတရွက်စွာ
 ဓမ္မနနံ့သောက အင်းဝနနံ့ရာဇာ
 ဘာဝနာမမြဲသောရမ္မက်တောက
 သိရွာပြန် လူပီသဖို့ ငါ . . ။ ။

တဏှာဝိပါတ်ဇုအကြောင်းဆက်နုန့် လည်လောင်လာခရီးသည်

တအောင့်တနားပင်မရပ်မနား
အကိုးအကားမပါခအာရုံစင်မြင့်မြင့်မာခုန်ဆင်း
အသစ်စက်စက်ချွတ်ပီးခ ပြန်မရသောရင်းနှီးမှုနုန့်
ဒုတိယဘုရားသခင်ကို ရှာပုံတော်ဖွင့် ခရီးဆက်လတ်တေ
ရိမ္မတ်ကျမ်းသစ်တရွက်ဇုဖြည့်စွက်ရအလျော့ပီးမှုတိ . . . ။

ဝေယျာဝစ္စမသင်္ခါမှုမျိုးနုန့်
အလုပ်ပြုတဖက်ကျေးကျွန်နုသားကောင်း
ပိုင်သီ ရှင်တူ သီမကွဲ ယုံကြည်မှုကို M 16 ထဲ
ထိုးသိပ်ထည့်လိုက်တေ
အပြီးလျင်ခလုတ်ကိုမောင်းတင်ဆွဲအဖွင့်
ဖောင်းဆို . . .
တစ်နုန့်တစ်ပေါင်းနှစ်မရသောသူညတိ
ပြုပျင်ဖိမရခြင်းရို့ တရိပ်ရိပ်ထိုးမြင့်လိုက်မမိနိုင်လို့
ငါ့ကိုငါပေခိုးထည့် တိုင်းကြည့်စွာတောင်
အားလုံးပေါင်းလေးပေသျှစ်လက်မ
ရုန်းတက် ချိတ် ဖက်လှာရစွာ တွင်းနှုတ်ခမ်းသားတိလေး
မချောမွှိနိုင်ခပျာ . . . ။

အားပြုနင်းစက္ကူတရွက်နု ကိုယ့်အိမ်မာ
 အရုဏ်မတက်ဖြစ်တေကလီစာနှစ်ခေါက်ကျိုးမှုန်သုန်သုန်နန့်
 ရုန်းကြွ ပြန်ထ ပြိုင်ဆိုင်မှုကိုလှန်ဖျားထောက်
 အငြီးအလွှားခုန်ကြည့်မိ
 ဖြစ်တည်မှု အားလုံးဒုအစကိုနောက်ပြန်လားနီရရုံကလွဲလို့
 (ကော်ဖီခါးခါးတခွက် လျှာဖျားထက်
 တောက်ခေါက်လားလီယင့်)

ဖျက်ရာပါမှင်ရည်ကြိုစက်ကရုန်းထွက်ပါရစီ
 ဘယ်ညာ အပုပ်ချ ပုတ်ခတ်မှုန့်ဝီးပါရစီ
 အရိုးယှင်းဆုံး ခေါင်းလောင်းမထိုးဖြစ်တေသင်ခန်းစာအချို့
 လူသားတိုင်းမက်မောတောင်းတခ ပြောတိုင်းဖြစ်
 ပိုးသားကတ္တီပါတချပ်
 ကိုယ့်ကိုကိုယ်အရူးဖြစ်တွက်ဆမီးကြည့်ရုံ . . . ။

လီပြင်းတိုက်အနာစိမ်းစိမ်းရို့မှည့်ကြွီချင်ခရေ
 တဖက်ချောင်းချဲ့လွှာရစ်ပတ်ကင်းပွန်းတပ်ခံလိုက်ရ
 တဏှာဝိပါတ်အကြောင်းဆက်နန့် လည်ဇောင်လာသတ္တဝါဒု
 ထောင့်စုံကိုအင်္ဂါထဲ ပြင်း စူးယှဒုက္ခရို့ဖိမ်မပျက်တည်းခိုမှုနန့်
 . . . ။

အသီယပ်မ အရှင်ယပ်မ တလက်ပီးပါ
 ပရခက်ထန် ကြမ်းတမ်းလှိုက်စားမှုက
 အငြီးသတ်ရွက်မြောက်ခချင်လို့ . . . ။ ။


အာဟာရတကြောပင်အိမ်

ဖြတ်ခနဲနှိပ်လိုက်တေစခရိန်ချော့ပိုင်
ပြောင်းလွဲမှုတိ အဂင့်လျင်လွန်းပါရေ . . ။

နောင်တမသိရ အမှားတခုကျူးလွန်မိတိုင်း
အဝါချင်းမတူ ကျိန်စာထိုးရင်ရိုးတိ ပျော့ခြွေငိုက်စိုက်
လုပ်ဇာတ်အညွန့် ပြဋ္ဌာန်းမဲ့ အနာဂတ်ဥပဒေထဲမာ
တပိုင်းသီခံယူချက်ရို့ တလိမ့်လိမ့်ပျော်ဆင်းလှာကတ်ရ . . ။

ကိုယ့်အဓိပ္ပာယ်နန့်ကိုယ် အပျင်းပြယ်ဖတ်ခေါက်သိမ်းရ
လိုချင်ခြင်းအချို့
ကိုယ်ထည်မဲ့သံလမ်းမာ မိုင်တရာနှုန်းနန့်
ရာသီပေါင်းများစွာကို တရွံရွံမောင်းနှင်နီလီယင့် . . ။

နီရာတကာ ဓာတ်သင့်လှာကတ်တေ အလွဲသုံးစားများ
တတောင်တမိုက် ဂေါင်းတလုံးတွေးခေါ်ဝန်ခံခြင်းပြယုဂ်မာ
နီကိုအပိုင်စီး တာဝန်ကျီအသိမိုက်မဲခြင်းရို့ ပြုံးစိစိနန့်
လောကကိုကျေးဇုတင်ပါရေလတ် . . ။



ကြည့်မမြင်အာဟာရတကြောထဲ
 နွမ်းရိစ္စာလျော်ခတ်လှာကတ်ရ
 ဝတီဖောင်နန်းက အနာဂတ်ကိုယ်စားပြုလက်ဗွီရာတိ
 တဖက်သတ်ဆက်ဆံခြင်း နီးစပ်ရာ အာဏာ ပညာ
 လူတန်းစားခွဲမှုမာ
 ရွှီအိုရောင်လိပ်ပြာတိ အကွဲကွဲ အပြီပြီနန့် . . . ။

ဒါဝင်မတွေးခ လူနန့်မျောက်နီးစပ်မှု သီအိုရီထဲ
 ဖွဲမီးတဖိုနန့် အိပ်တန်းဝင် ခုနှစ်စိုင့်ရို့
 ဖိတ်စာရ လူစိမ်းသည်မြို့ပြနွ နက်ဖန်ခါ သန်ဖက်ခါအဖို့
 မမြင်မစမ်းနန့် ဒုက္ခကိုအာဟာရလုပ်
 စားသုံးနီကတ်ယင့် . . . ။ ။



အနာဂတ်ပျိုးခင်းနန့်ကိုယ်စီအတ္ထုပ္ပတ်

ထိပ်ဆုံးထိတက်ကြည့် . . .

ရွတ်မြောက်ချင်ပါရေ 'ဆို'တလုံးနန့်
 နီခေါင်ခေါင်မြိသားတကွက်မာ စိုက်ပျိုးလှာကတ်
 တရွက်ချင်းစုတ်ပြီလား နိသခင်စီလိုရာညွှန်းကိန်းထဲ
 ဝီရိယမှန်းချက် ဇရာနယ်တဖက်ကိုပါးလို့ . . ။

ကိုယ့်ကိုကိုယ်တော်လှန်ခွံ

ဂေါင်းပေါင်းပေါင်းဝါကျတကြောင်းက
 အလီးမှားထမ်းတနိုင်တပိုင်းပက်ခုံးနန့်ပဋိပက္ခကိုမြီမြုပ်ဖို့လတ်
 ထော . . .

ပိုင်းရံမှုတဆီသျှော လိုလားခစွာပါ . . ။

ကိုယ့်ကြောင့်လီထုထဲမညစ်နွမ်းပါစီကော
 အတက် အဆင်း ရယ်သံတိ ပျောက်ကွယ်ခြင်းအစ
 ဒဏ်ရာမသိရ အမြစ်တွယ်ရီသောက်မြစ်ကိုစစ်ကြည့်ကော
 အချိုသတ် လာဘ်ထိုးဖုံးဝှက်ခြင်းတဖဲ့သျှပတ်စီ
 အစိုင်လိုက်လဲပြိုကျဆုံးဖို့ ဝရဇိန်မိုးကြိုးသွားပါရေ . . ။

တကိုယ်ကောင်းဆန်ခြင်းနန့်
 အတိဿယကိုပြန်ရနိုင်ဖို့တော့မထင်
 ခွဲတမ်းချရွီးထုတ်မှုထဲ စကော့ဝီစကီကိုကြိုက်တေ
 စည်းဝိုင်းထက်ပြိုင်ဖက်ယှားရလှာခဆုက
 ကိုယ့်ကိုကိုယ် ချစ်လို့ပင်ဖြစ်တေ
 အထက်စီး အတ်ဆော့ပါတန်းစက်ရည်တပေါက်ကိုတောင်
 မယောင်တတ်ကတ်စွာ
 ရင်နာလွန်းလို့ပါ . . ။

သချိုင်းကိုတဖက်လှမ်းကုန်ဆုံးချိန်ကြားမာခလုံးသတ်လဲယင်း
 လက်ချိုးရွီတွက်မိသူတယောက်က
 အထပ်ထပ်သက်ပြင်း ကုဋေတသန်းသီလို့
 သရဏဂုံတောင်အလွတ်ရွတ်တတ်ခပျာလေ . . ။

ပွားမျိုးစိရင်သန်စိမ်းစိုဖို့
 လောဘအရင်းစိုက် ထိန်းကွပ်မပျိုးတတ်ကတ်စွာ
 သဘာဝကိုဂျည်းပုံမချလိုက်ပါကော . . . ။ ။

မြို့နိုင်ယာရီ

နို့သက်ငင်ပီပြင်မှုအချင်းတပတ်က
 ဘေးကျပ် နံကျပ်မရဏနုဿတိကိုပွဲဖက်ယင်း
 အူသုံးလုံးဆင့် လှုပ်ရွှရုန်းထွက်ပါလတ်တေ . . ။

ညှို့ငင်သံပြင်းလွန်း တက်စားမရ ဆာလောင်ခြင်းတိနန့်
 မတူညီကွဲပြားရ တလွဲကျစ်မွီးမြူဝါဒကို
 ဆရာတင်မြောက်စား
 သုတေသနလုပ်ထုံးနန့်
 သုံးပွာရောသောက်ဆမ်းတခွက်ကိုအတွင်းစမ်းတီးဖြတ်မိ
 သုံးစားမရ ဓားအိမ်ဝင့် ဓားတလက်ခံယူချက်မျိုးနန့်
 အရဲစွန့်ထိုးစစ်ဆင် ဖြိုခွင်းအင်အားသုံးလှာခ
 အထင်ကရမှန်းချက်က ငါ တလုံးကြားမာစောင်းလို့ . . ။

ဧလောက်တောင် ခရေစီဖြစ် ချင်ခြင်းတရားတိ
 ကျပ်မပြည့် ကျွန်းသစ်တတုံးပိုင် တန်ဖိုးလျော့ ပင်းအ
 အသီသပ်ဆုံးနန့်အလှပဆုံးလို့
 ထင်ထားမှင်ကူးရာရို့ဖာသားလိုက်တုံးတိ
 စတုရန်း မိုင်အကွာအဝေးသတ်မှတ်နှုန်းကိုတိုင်းထွာဖို့
 ကြက်တွန်သံကိုစောင့်ယင်း အိပ်မောကျခရလီရေ . . ။



တခုက အမြင်မှန်မရခြင်းနန့်
 သားအိမ်ခြပ်မြို့ပြနုပညတ်သိက္ခာကို
 အကျယ်တဝင့်ဖွင့်ဆိုလှာကတ်
 ထပ်ကြပ်မကွာလိုက် ဝဋ်တလုံးရှိက မနိုင်မနင်းသတ်ပုံတိ
 လိုင်တင်ခံရမှုကိုမညီးငိုနှိုင်းကတ်ယာ . . . ။

ဇီဝမတိုးခ ဖာထီးမှုတိုင်းမာ
 အရီကျွတ် ပစ္စုပ္ပန်တခင်းဒွိဟနန့်ပျော်ပါး
 သားသတ်လိုင်ဆင်ရ လှံကိုင်ရဲတင်းသျှင်ရို့
 ပါဏာတိပါတ လိမ်ဝါထိုးကျွေး ပြောင်မြောက်လိုက်ပုံက
 အရို့ အနောက် တောင် မြောက် နဂရ
 ဘုမ္မိရို့စည်သံကိုတိန်းလို့
 ပြန်ပြောခွင့်မရ အသက်ငင်မွန်းကျပ်ပိတ်ဆိုမှုကြားမာ
 မာရယုချိုင်ကြိုးတပင် ပွင့်ဖိုနန့်ပုဆိုး မှားဝတ်လို့
 ဒဏ္ဍာရီဆန်ရေ
 မယုံကေ ကြည့် . . .
 နန်းရာကုန်းထက်မာတောင်
 ဆပ်ပြာတောင်းနီလိုက်ကတ်ပုံတိ . . . ။ ။

တနိုင်တပိုင်သီဆုံးခြင်း

ထို ရှိတည့်တည့်နား နီရာရွတ်တခု
တခေါက်အညောင်းဖြယ် ဝင်ထိုင်ဖို့ကြိုးစား
မလှမ်းမကမ်းအရောက် ပုရစ်မျက်နှာပြမှုက
(No Parking)လတ် . . ။

ခဲပျစ်ရအမြင်မှန်ရှိ ရင်ဘတ်ကိုစည်တီး
ဖြူပုလဲနှစ်ဖက်ကြားက အရင့်အမာတိဒရဟောပြီးထွက်တေ
တမြုံမြုံနန့်ဝါရင့်ပါလတ်တေ အနိုင်ယူဖိနှိပ်မှုတိ
အထစ်ထစ် အငေါ့ငေါ့အချိုးမကျခြင်း
သံမဏိမူပရပိုက်တော်ထဲ
ရီမာအရုပ်ဆွဲ တုပ ကိုင်းညွန့်လာရသူ
ဖန်ဆင်းသျှင်အသစ်ကိုရာ တခါပြန်တမ်းတလိုလားခ . . ။

စည်းမကျော်ရဒါသီကျအမိန့်ကြားမာ
အတောင်ပေါက် ဇရာ နတ္ထိနန့်သူတပြန်
ကိုယ်တပြန်လုံးထွီးယင်း
နာရီသိုးကိုတဝကြီးစားလို့ ဥပဒ်ကသခင်ဖြစ်တေ
အပိတ် အဖွင့် မျက်ခမ်းထက်အပွီးကားကားရို့
ချိုင်အားကြီးရေပင် . . ။



ထိုးဝါးကန်ချိန်တောင်မရလိုက်
 နောက်ထပ် . . .

.....

ဝတ္တရားနစ်နာမှုနန့် ယမကာခွက်ထဲ တခါပြန်ဆင်းချိုး
 သို့ခြောက်အကာတဖဲ့ နူးဖတ်ပျော့ညံ့ချင်တုန်းရာသီ
 ဗလအားကိုးထင်ရာစိုင်းမာရ်နတ်ရို့တင်းမာလိုက်ပုံများ
 ညမထွက်ရ ပုဒ်မက(၁၄၄)

အိန်း . . .

(တမိုးသောက်လုံးမြုပ်နွံပါလတ်စွာ နီရာလွတ်ကိုမဟိ)

..... || ||

မိုးဖွားခြင်းမှ

အဖြစ်နုနုအပြစ်ကိုစိခြုပ်ရဒိုင်ယာရီအလွမ်းတပိုဒ်ပိုင်
 ခေါက်သိမ်းဂေါင်းအုံးဖို့ အကျိုးဖန်ရက်ချုပ်တခုထဲ
 ဗေဒလွန်နက်ယှိုင်းမှုလိုအပ်ချက်က အမှန်တရားအတွက်
 ပီးဆပ်ခြင်းနုနုတည်ဆောက်တတ်ခပျာ . . ။

ခနဖန်ခွက်က ကမောက်ကမသတ္တိကြွမှုမာ
 အရိပ်သန့်သန့်တဗူးတောင်မပိုင်ဆိုင်နိုင်သိ
 အဝါဆင်တမန်တော် ရဲဝံ့ပြတ်သားမှုတိက
 အခါခါကျွမ်းဆွေးရူးသွပ်ရယောင်ထိ . . ။

ရဲစွမ်းသတ္တိနုနုကိုတောင်းချီတက်လှာခ
 စပြီးယင်းစ လိုအပ်ချက်တိအတွက် အစာတပ်ပစ်မိခ
 လည်ဇောင်လာ မနုဿဆိုလည်တခုနဲ့ တုံခါညှို့ငင်မှုနုနု
 ဝတ္တရားမပျက်တထစ်ချင်းခွတ်လားခင်ပွန်းကောင်းလီစိမ်းတိ
 ပြင်းထန်စီခရေကား . . ။

အချော အကြမ်းပေါင်းစပ်မှုတခုအတွက်
 ကလီစာရာသီမြစ်မာ မျက်ရည်တိဖောက်သွန်လို့
 အလီစီထိုး အံဝင်ဝင်မကျ နာတာရှည်အဆိပ်လူးမြားတစင်း
 နီရောင်ငုပ်ပက္ခဒိန်ပျိုထက်
 ဇောချွေးမကန်မကန်ကိုခင်းကျင်း
 ယေလေ တဖက်နှိတ်ကုန်ဆုံးချိန်တိရာ
 ဝှန်ကျပုပ်သိုးလှာရေ . . ။

တဒဂ်ဖြစ်ပွားမှုမျိုးနုန့် မလျော့သောဇွဲတိ
 ကိုင်းညွန့် ပြန်တည့် အရီကျွတ်ဖဝါးသက်လုံးနုန့်
 အီးအီးစက်စက် လက်ရွတ်ကေကျီဆက်ဆံခြင်း
 မြီကြီးကိုနင်းဖြတ်
 ရောင်း စွံ တပြားမရ ဒါဒေါင်ကျခြင်းရို့ထပ်ပါလတ်တေ
 အနီမတတ်ခြင်းနုန့် နီတတ်ယောင်ကြိုးစားနှိုင်ခပျာ . . ။

နားလည်မှုကိုခြင်ကြည့်ယင်း
 အမာရွက်နုန့်တေးသီရအကြံကျပ်ဆိတ်ခေါင်မှု
 တရွက်လှန်တိုင်းအယှဲး ဘူသရေမဟိကြွင်းရလဒ်နုန့်
 ပဲထိန်းမဲ့ရီသီဗဟိုကို မရမက စိုက်ထူလာဝီရိယရွင့်တိ
 ကမ်းပါးကသဲတစကိုပင်မတို့ထိနှိုင်ခ . . ။

နောက်ဆုံးရသတင်းတပုဒ်နုန့်
 တနီရာစီအူကြောင်းခွဲဂေါင်းဖြီးလှာရေ
 ရွစိစိသန်းတကောင်အစာငတ်ဆန္ဒပြရေပိုင်
 အောက်ခြီပြတ်ရိတ်သိမ်းလား အမ္မီးအမျှင်ကြားမာ
 ရင့်သီးခြင်းနီညိုချိန်ကို ဇွဲကောင်းကောင်းနုန့်ဖြတ်မေ။ ။

သို့လျှောင်ခြင်းနက်ဖန်ခါသို့

နိစိုင်မော်ဖူးရအရုဏ်ပန်းချီတချုပ်
ကြိုင်လင်ပြတ်သားခြင်းမတို့
အဂင့်ပင် မတို့
မတို့ . . ။

ခြစ်ရာ ကြောင်းရာမဟိ အခေါင်ဖြုတ်မှန်သားပြင်အောက်
ကျွမ်းဆီးစပြု ကိုယ့်ကိုကိုယ်စီရင်ဖို့
ကြိုးစားနီသူတယောက်ပိုင်
အကျည်းတန်နီလိုက်ပုံတိ . . ။

မှတ်မှတ်ရရ ခေါ်ထူးပါလတ်တေ ဝေါဟာရတလုံးတောင်
စွန့်ပစ် အညစ်အကြေး ဖုံးလွှမ်း အခိုးအနံ့တိကြားမာ
စိကြားပြတ်ထွက်ရ ချိုင်ကြိုးတပင်သဘောသဘာဝက
တဖောင်ကူးမနောတိ ကျိုးလို့ ကြီလို့ . . ။




အရောင်တင်သုညတလုံးစစ်တမ်းကို
 ဇလဗေဒသတိပီးချက်အရ
 အလှည့်ကျပေါက်ရောက် ဖြစ်ပွားမှုအချိန်သူ့အခါတိ
 အခါခါ ထုတ်ရွှင်ပြသနီစွာ အညွှန်းမပါရေဇာတ်က
 ရယ်သံတိ တိန်းဆိတ်မိနီလို့ . . ။

နိဟိသရွှိသွီးမိခ အနာပါပတ္တမြားတလုံး
 ပွတ်ရာ တိုက်ရာနန့် ပွန်းပဲ့မြောင်းထယင်း
 နှစ်ကာလပိဝပ် ပုံထပ်လှာရ အညွှက်အဆွီးတိ
 လတ်လတ်ဆတ်ဆတ်သေ့တချောင်း
 ပရိယာယ်နုတမျှင်နှာအကူးမာ
 လုံးထုတ်သန့်ယှင်းခွင့် အမှန်ပင်ရချင်ယင့် . . . ။ ။

ကွက်လပ်

တဒုန်းဒုန်းနုနုယှံးနိမ့်ပါလတ်တေ
 တဒုဒုလို့နီရေ
 တဒုဒုလို့နီရေ . . ။

မြတ်နိုးမှုတယုတယနုပြုစု
 အပြောင်မြောက်ဆုံးကမ္မည်းထိုးကတိ
 အထပ်ထပ်ပုံအောပြီးခါမှ
 ပြုံးအားကောင်း လီညင်းဖြိုး မုတ်သုန်တစင်း
 ရက်ရက်စက်စက်ကိုကြွီလို့
 တဒုဒုလို့နီရေ
 တဒုဒုလို့နီရေ . . ။



ဝေဒနာလူးညည့်ပလင်ထက် မှောက်ပြန်လူးရွံ့
 အိပ်မက်တထောက်ညရို့ လန်ဖြန့်ရွှင် ဆောက်တည်ရာမရ
 ပုတ္တရိုင်းဂူအောင်းစကားလုံး စိန်ခေါ်ကျင်ကွင်းမှုထဲ
 ရှိဆို . .
 အဝါကဒ်တော့ရလိုက်တေ
 တခုခုလိုနီရေ
 တခုခုလိုနီရေ . . ။

ထစ်ချုန်းရွာ ကိုယ်ခွာ စိတ်မကပ် စံပြလိပ်ပြာရို့
 ဖိအားပီး အနိုင်ပိုင်းထိန်းချုပ်မှု လှောင်ခြံငဲ့က
 မျှော်လင့်တကြီး စိတ်ရွတ်ကိုယ်ရွတ်
 ဝါးခနဲသန်းပိုင်ခွင့်ကိုလိုလား
 ပင့်မ ကရုဏာယောင်ပုန်း အဓမ္မလောင်မီးပွားခြင်းတိ
 လက်ညှိုးထိုးပေါက်ကိုမရ
 တခုခုလိုနီရေ
 တခုခုလိုနီရေ . . ။

ဓလိဆန်သင်္ခါရလုပ်ထုံး ခိုင်းစီခြင်းအရ
 အခန်းဆက် အော်ပရာနှစ်ပါးသားကို ပါးကွက်ကျားကပြဖို့
 တခုခုလိုနီရေ
 တခုခုလိုနီရေ

 ။ ။

လောင်းရိပ်ပိသကြွန်

အခင်းအကျင်းမိ ဘဝတိထဲ
 ကြမ်းတခင်းစာဂေါင်းချဖို့ ခြုပ်ရဖာရ
 စာနာမှုတရားနည်းပါးလွန်းလို့
 ဝင်ရိုးဇုထာင့်စွန်း အလင်းပျပျတိထဲ
 မသိချာကေလေ့ သင်္ဇင်ကြွီဆင်းယင်း
 မြို့အဝင်ညည့်က မှောင်လွန်းရေ . . . ။

မာယာသျှင်အသစ်ကိုဖန်ဆင်းဖို့
 ရွှီနန်းအလယ်မာ မထည်ဝါနိုင်ခရေ
 အပယ်ခံလူသားရို့ရပ်တည်မှု
 ရိုးမဇုတက်ခေါက်သံနန့်တတူ
 မရဏတန်းခါးကို အခါခါခေါက်
 သီဆုံးနီကျဘဝက ပပါးသျှေရာ . . . ။

လမ်းဟောင်းရာဇဝင်ထဲ ပစ်စလက်ခတ်
 အိပ်တန်းပြန်ငှက်သျှေရို့
 ဝံသာနုစစ်တမ်းကိုဖြတ်ကျော်
 နန္ဒီထထွီးအသိုက်အမြုံတခုအတွက်
 မျက်ရည်တိ ဇာလောက်လိုအပ်သီလေး . . . ။



အတိတ်မာ ဝံလက်ရို့သွီးသားတော်စပ်ဖူးခ
 အရိုးခံဆန္ဒအကွာအဝေးတိကို
 ရှိအိုရောင်နက်ဖန်ခါအတွက်
 ကိုယ့်သမိုင်းကိုရိုး ကိုယ့်ဇာတ်ကိုခင်းကတ်မေ . . . ။

ပုံသဏ္ဍာန်အမျိုးမျိုးနန့် နှလုံးသားကိုဓားနန့်ခွဲ
 တသက်စာယှုံးနိမ့်မှုအတွက်
 နို့လယ်ခေါင်မာလမ်းထလျှောက် ကန္တာရခရီးသည်တစု
 ကိုယ့်ပေါင်သားကို ကိုယ်လှန်ထောင်း
 နို့ဦးဆိုစွာ သံမဏိကိုလောက်ကျွမ်းပြာကျစီရေပိုင်
 ပုဒ်စာမဟိရေ ပဟေဠိတခုထဲ
 လောင်းရိပ်ပိနီကတ်စွာ ဝမ်းနည်းရေ . . . ။ ။

မှုန်ဝါးပြယ်ဂန္ထဝင်

ကိုယ့်အဖို့နဲ့ကိုယ် လောင်ကျွမ်းရဖြစ်စဉ်တော်စွာ
 အဆုံးသတ်ခွင့်မရရေ ဇာတ်လမ်း
 ဝေဒနာနိပယောဂခါးသီးခြင်းကြား
 နိဂုံးမလှ ဇာတ်ဝင်ခန်းအဖြစ်နဲ့
 လူဖြစ်ရခွင့် အယှုံးကြီးယှုံးရေ ဘဝ . . ။

နိစိုင့်မှတ်တမ်းတိကို
 မိုးတပြက် နီတပြက်မာ ထုတ်လှမ်း
 အလစ်ချောင်းဥတုရို့က တရွားရွားနုနု
 ပြန် ပြန် အဖတ်ဆယ်လို့ကိုမရ . . ။

ရက်စက်မှုတခါတရီဆိုကေလေး
 အတွင်းကြိဝတ္ထုရို့ခမျာ
 ကမ်းမမြင် လမ်းမတို့ နလန်မထူနှိုင်းရေကြား
 ဂေါင်းပုံဖြတ်တတ်တေ အမိုက်ညည့်တိ
 များလိုက်တေဖြစ်ခြင်း . . ။

တစုံတခုသော ကိုယ်စီဘေးထွက်ကောင်းကျိုးတိ
 ဒေပိုင်ဂျည်း မှောင်မိုက်စွာဆိတ်သုဉ်းရဖို့လား
 ဂေါင်းချင်းစပ်အဓိပ္ပာယ်ကိုလိုက်နှိုးယင်း
 အလန့်တကြားကျပျောက်ရ အိပ်မက်
 မှုန်ဝါးပြယ် ဂန္ထဝင်နှလုံးသားတိအတွက်
 အရိုင်းဆန်သုညတိကရာ ဘဝင်တခိုက်ခိုက်နုနု . . . ။ ။

ရိုးမသစ်သီး

တိုင်ပျာယေ ၂၃၀
စောင်းကြိုးခတ်သံပိုင်
တဖြုတ်ဖြုတ် လိမ့်ကြွီပါလတ်စွာတော့မဟုတ်

အင်္ဂါမညီပေါ့ပျက်ပျက်အနှစ်သာရ
စရန်ပီးခိုင်မာခြင်းမျိုးက
စိတ်ကြိုးပြတ်ဖိနပ်တရံမာ မန္တန်ရွတ်တဖက်လှဲဖို့လိုနီ
အငိုယုံဓာတ်လုံးအခန်းခွဲပြဿနာအစပျိုးရာက
တစိစိဂလုံခံလှိုက်စားလှာကတ်ရ
တစာစာနန်မြီခကြီကွဲရ ဝေါငှက်တကောင်နု
အန္တိမ မတိုင်ခင်တပ်မက် အပြင်းပြဆုံးဆန္ဒက
၁၁၄၆ က ကိုင်းညွန့်လဲလားခ
သားမတင် အမြစ်ပြတ်ရိုးမသစ်သီးတလုံးကို
မြည်းစမ်းခွင့်ရကေ . . . ။ ။

ပကတိထိုးတန့်နီသောလက်တံ

ဝုမှ . . .
 ခြံဆုံးဂေါင်းဆုံးကြည့်ဖြစ်တေ
 ရုပ်က ပုံမှန်ထက်အဆီကျပြင်းလှာစွာ
 အားလုံးထက်မိတ်ဆွဲကောင်းပီသလို့ . . . ။

သားဆုံးမိခင်တယောက်ပိုင်
 တရွတ်ရွတ်နန့်ယူကျုံးမရတပိုင်းသီရေအဖြစ်
 တလိမ့်လိမ့်ထိန်းမနှိုင်တာကျုံးပါလတ်စွာ
 ပုံမှန်ထက်ပိုငန့်တူးလှာရေ ချစ်သူ . . ။

လုံးဝ အိပ်ရာထဲ ငေါက်ခနဲပျော့ခွီလဲလား
 တောင်တန်းတိ ပင်လယ်ကိုထမ်းလို့ လီးရေ
 ကွင်းပြင်တိ နက်ယှိုင်းမြောင်းထပါလတ်တေ
 ယေကေလေး ချစ်သူ . . .
 အလျင်ထက်ပြင်းယှယှကိုမှ ကြိုက်တေ . . ။



အပြုံးတုကိုရွှီရောင်ကွပ်ပြဋ္ဌာန်း
 စတေကာတိုးပစ်လိုက်ရုံနန့် ကိစ္စပြီးမြောက်တေထင်ခစွာ
 ကျူတံမသိခ လိုက်လျောအယှုံးပီးမှုတိပါ ချစ်သူ . . ။

အားလုံးကအတွန့်တွန့်အခေါက်ခေါက်နန့်အာရုံတိမှုန်ဝါး
 ခွဲခြမ်းစိပ်ဖြာမရယောင်ဆယ်စင်းမက
 အဟိန်ပြင်းပြိုဆင်းခြင်းတိ ခွဲဝီပီးမရ
 အရိုးဆိုးသည်းခြိပန်းဖွလိုက် ပဲ့ကြီခြင်းကြားမာ
 ကြံကြံဖန်ဖန် စုဗူးထဲထိုးထည့် အတောင်ပေါက်နှိုးစက်များ
 ဇလောက်ပင်ထိုးတန့်ဖို့အမိန့်ပီးခလီရေလား ချစ်သူ။ ။



ဝင်သက်မှားခြံသံတစုံ

ever times ဖြစ်နီလိုက်ပုံက
 တပတ်ပြီးတပတ် နှောင်ထုံးတွေဝေခြင်းတိ
 တိုကန်စောင့်လူနာတယောက် ဂနာမငြိမ်ခြင်းမျိုးနုန့်
 ဘုရားမသိ ကျမ်းပြီးလားရေမိတ္တပလပိုင်
 စွတ်စိုထားသံချောင်းခေါက်သံက နားဝမာအပိုင်းပိုင်း
 ကြက်သီးမွီးညှင်းရို့ကိုယ့်ကိုချိုးဆစ် ထုံကျိုင်အီးခဲမှုတိ
 လက်တို့ နှုတ်ခွန်းဆက်သရုံကလွဲလို့
 အရာအားလုံးက ပကတိကွဲလွဲခြင်းများစွာ . . ။

အဖော်လုပ်ဆန့်ကျင်ဖက်ကတဆိပင်မျှတခြင်းမဟိ
 တချက်တချက်နှုတ်ယူလား
 အစိုင်အခဲသွီးခွန်နှုန်းဒီဂရီအပြည့်
 တမိုးသောက်လုံးရိမချိုးရ ပေါက်ပြဲမှုကိုယ်စီနန့်
 ထရံထက်ကအလွမ်းများ
 မနပ်တနပ်စားဖူး ထုထွင်းရာနာမည်တလုံး
 ပြန်ပြန်ရွှိတွက် အခန့်မသင့်မှုများ
 နားလည်ယောင်နန့်နားမလည်ပဲတီးခတ်ရ ၁၂ ပင်
 ကကြိုးထဲ
 ဒို့ ရေ မိ ဖာ မသိသော
 ခြောက်လှန့်ခြင်းအညောင်းဆိုက်မှုများ

ဖြစ်စဉ်ဓမ္မတာရို့အရိပါးပေါက်ပြဲ
 တခါကလိုက်လျှောပီးဖူးခ
 မိုးတစက်လီပြင်ကနီကြတ်ပါလတ်တေ
 အရိပ်မသိရ မစိစစ်မှုအတွက်ဘယဆီးပင်တိလေးယှားရေ
 တထည်နှွမ်းအရောင်နန့်
 နို့ပြင်လှိုင်းထမှုကိုတေးသိဖို့ကြိုးစားခစွာလေး
 လက်လွန် ဒြိုလွန်ရာမနား . . . ။

ယင်းပိုင်နန့် . . .
 အသက်ယူမြွန်းကျပ်ဆိုပိတ်ခြင်းကြားမာ
 အခန်းအပြင်က ဒြိသံတစုံလူးမဆင်းနိုင်သိစွာ
 အယောင်ယောင် အမှားအမှားနန့် . . . ။ ။

မီးခိုးမထွက်တေရွာ

ကြားအောင်ပြောမေ
တအီအီနန့်သူကရာအနိုင်ပိုင်းတတ်တေ . . ။

နီရာဒေသအလိုက်
တူညီခြင်းအမှတ်အသားတခုစီလန်ပြုတ်မလားယောင်
အခိုင်အမာကို နှိပ်ခတ်လှာကတ်ယင့် . . ။

တွေဝေခြင်းရို့ပေါင်းစုထားအဝိဇ္ဇာပျဉ်ထောင်အိမ်မဲတလုံးထဲ
ထော ချစ်တေ မုန်းရေ ကရုဏာ မေတ္တာ ပေါင်း နှုတ်
သံယောဇဉ်
ရစ်ပတ်ဗဟိုပင်မထဲ
တယောက်ကိုတယောက်မခွဲနိုင်မခွာဝံ့ကတ်စွာ
ဖြစ်ရိုးဖြစ်စိုင်းလို့ ထင်မှတ်နီကတ်ယင့် . . ။

မမ္မသီကျင့်ဝတ်အနားထပ်ပုဒ်မကိုသမုဒယနန့်စစ်ခင်း
အထင်ကရမှန်းချက် ပြောဆို ယဉ်ကျေးမှုရို့အဆုံး
မှတ်မှတ်ရရ အင်အားဖြည့်တပ်စွဲနီရာယူမိခါမှ
ဖောက်ခနဲ
တချပ်ပြန်လှန်အသတ် ခိုင်စားမှန်းသိရေ . . ။



တလှုပ်လှုပ်တောကမြင်ကွင်းတိ ဆာလောင်နီကတ်ယင့်
 မာယာပြိုမိုးရိပ်ရို့ပုံမှန်ထက်များလားရေအဖြစ်မျိုး
 ကပျာကယာ သာယာမှုအစပ်နား
 ခြံဆန့်ဂေါင်းဆန့်အိပ်လိုက်ပါအုံး
 ထွက်ခွာချိန်ကျ အသူကငြင်းဆန်နှိုင်လို့လေး . . . ။

ယင်းပိုင်ပျာယေ
 မကြားချင် မမြင်ချင် မခေါ်ပါကေ့လို့
 ဇာလောက်ပင် ဝါရင့် သမ္ဘာရင့်ဆိုဆို
 ဆွဲစပ် မျိုးစပ် တဖောင်စီးမီးခိုးမထွက်တေရွာကို
 တချိန်ချိန် အသင်ရို့လေး ပုံမှန်လွမ်းတတ်လှာလိမေ။ ။

ရုပ်ပြပညတ်တခုက မိုးမလင်းဘဲ

တခုချင်းစီလိုက်ကောက်နီရယင့်
ငယ်သံပါယောင်ခေါ်ရ လောကီကာမဂုဏ်စည်းစိမ်ရို့
အသတ်မတူဝင်ပုံစံမျိုးနန့်စိမ်းကားယောင်လွဲလိုက်ပုံတိ

အပူလွန်သတိသံဝေဂ လက်သုံးမာနတဖဲ့စာကို
မပြည့်စုံခြင်းရို့ဖုံးအုပ် နီမပွင့်အရပ်ဒေသမာ
အရည်ကြ မြီဩစာနန့်
သုတဆန်ဆန် ပြောတတ် နီတတ် ထိုင်တတ်ဖို့
လျှော်ဖွပ်လှာရချွေးစက်တိလေး ပါးလို့ . . ။

အနှစ်ချုပ်ဆင်မြန်းလှာရ ကျဘမ်းသက်လုံးအချို့
အလုအယက် ဆီဆမ်းထွက်တေ ပျို့ အို
နီဝုံးတမ်းခြင်းမဖွဲ့ခင်
တိုတိုနန့်လိုရင်းပြီးသုခတလုံးကို
ဒုတ်သီမုတ်သီလိုက်ရှာယင်း
အိုင်ထွန်းလှာရ မျက်ရည်ပုံညများ
ပရိတ်သတ်မလို ကိုယ်ဆို ကိုယ်တီး ဖြေဖျော်တင်ဆက်မှုထဲ
အပြိန်းပြိန်းထ ရုပ်ပြပညတ်က မိုးမလင်းဘဲမာ
အကျိုးသက်ရောက်မှု နိုးလက်ခုပ်သံတိ
ပြန်တင်သံလှိုင်ဖူးခချင်ယင့် . . . ။ ။

အညှာခိုင်အမွှီးဆုံးပန်း

အစကို အထုပ်ထဲဖြူရှာ
တလှမ်းချင်း တစချင်းဆွဲဆုတ်ပစ်ပက္ခဒိန်အထပ်ထပ်
ခြံရာလက်ရာမပျက် အတိုင်းသားပြန်ဖြိုးမောက်ပါလတ်တေ
ပန်းမဝင်နိဒါန်းသဘောအရ ဇာကိုအပြစ်ဖွဲ့ဖို့လေး . . ။

အသိတလုံးနုနုပုံဖော် ပွဲထုတ်လှာခကာလာစုံဖြစ်ချင်ဇောတိ
အလှပဆုံး အလျား အနံ့ ချိန်ဆပစ်တင်လိုက်ခါမှ
အလီလီ အဖန်ဖန် ဧရိယာပြင်ပကိုချိတ်ဆက်မိနီလို့ . . ။

ယင်းပိုင်နုနု
အိပ်မောကျလက်သည်းချွန် ရာဂကိုယ်အိမ်မာ
ဖြည့်မပြည့် ကျီလှောင်ရမှုအတွက်
တပင်တိုင်ခြံလိမ်ကျိတ် လောဘကပေါက်ဖွားနှုန်းလျင်ရေ
ကြီးထွားခြင်းကာမကြောင့် တဏှာနုနုငြိစွန်းနီကတ်စွာ
အမောဟတိစိမ်းလန်းနီကတ်ယင့် . . ။

စွန့်ပစ်ရခက် ကိလေသာအညစ်အကြေးကြားမာ
ဝီဝီပြင်ပြင် အပုပ်ကောင်ကို သရုပ်ဆောင်လှာကတ်ရ
တရွံရွံကုန်ဆုံး ပမာဏများပြား မရဏစန့်တီမိတာထဲ
ဓမ္မပန်းကိုနှလုံးသွင်း မမြင်မချင်းကတော့ကေ
သံသရာလမ်းမှား အပယ်တန်းခါးက ပွင့်ဟနီဖို့သိ . . ။ ။

ဘဝငတ်သူတယောက်ဝတ်လက်စဘဝ

သောက်လက်စပန်းတူရို့၊
 အငှားခန္ဓာနန်းလမ်းလျှောက်တတ်ခယာ
 ရင်ချင်းဆက်ဥတုငွီဖြူပွင့်ဖတ်ရို့၊
 စောစောစီးစီးမွီးမြနီကတ်ယင့်
 ဆိုးခြင်း ကောင်းခြင်းဒွန်တွဲထားအာဝါသက
 တည်ငြိမ်လိုက်တေနှုန်း . . ။

ကျဉ်းမြောင်းဘောင်တခုကတန်းတူးညီမျှခြင်းလတ်
 နှင်းဆမ်းထား ပန်းရို့လန်းရာမြီမာ
 ကိုင်းခြောက်နင်းရီသောက်ဆင်းလှာခ
 အဖော်ကွဲဥဩတကောင်ပါ အမင်
 ကြိုးစားရပ်တည်မှုကိုအစားထိုးမြောက်ကြည့်ပါရေ
 ရလဒ်ဖရိုဖရဲနန်းနုနုကိုအားကျမိခစွာ
 မွီးရာပါဗီဇ ပင်ကိုယ်အားနည်းချက်က
 ၁၁ မီးငြိမ်းအီးချင်ခရေ အကောင် . . ။

ပစ္စုပ္ပန်အာဟာရဓာတ် ဝန်ဆောင်မှုတခုချင်းစီက
 အလှကိုဘဝနန်းမရင်းတတ်တေစက္ကန့်သိုးတိ
 အခပီးများသလောက် တနိထက်တနိ အတုတိပေါရေ
 အနုစိတ်ဗေဒနန်းခွဲစိပ်ခ အက္ခရာအချို့လေး
 ထမင်းကျန် ဟင်းကျန်တောင်းစားနီကတ်ယင့် . . ။



ကောင်းစားဖို့အကျင့်တိ
 အရည်ကြို သံသရာညစိုးတန်းမာ
 နှစ်ခေါက်ချိုးငါးစိမ်းသည်ရို့အလျင်ကထက်များရေ
 အတွက်ခံပါအုံး
 မုံဖူးသရွိဖက်သီအပြုံးတိ ရပ်မြဲတိုင်းရပ်လို့ထော . . . ။

‘မ’ဓာတ်မပါပဲ ဘယ် ညာ နှစ်ဖက်ရို့အနီရောင်တဥပြီးတဥ
 ငါစွာ အရာရာကိုအကောင်းတွေးညှိခွင့်ရချင်လို့
 ကိုယ်ထင်ပြအနုဿယကို ပြန်ရွတ်တေ ပြန်ကောက်တေ
 ယင်းပိုင်နန်
 ရိုင်သမ်ပြင်းကြိုးတပတ်လျော့ပီးခရလီရေ . . . ။

အိန် . . .
 ကပျာကယာ alarm,alarm ထမအော်နှိုင်သိစွာ
 ကောက်ယူစီကုံးကံကြမ္မာ ဦးသာစိန်ပန်း တခုချင်းစီနု
 နီလွန်လရိပ်တိ
 လာလမ်းအတိုင်းရွှိလို့ . . . ။ ။

မော်ဒန်အလွမ်း

ယင်းနိက

အသစ်စက်စက်ချွတ်ပီးလိုက်ရရေ
 တိုင်ဆိုင်မှုအတွက် ခွင့်ရွတ်ပါဆိုစကားနန့်
 နှစ်ကာလကျက်ထိုး ငါ့လုံးသားတန်းခါးကို
 ပန်းနုချယ်မျက်ဝန်း နှင်းဆီရောင်နှုတ်ခမ်းတစုံက
 တဒေါက်ဒေါက် ခြံဖွနင်းခေါက်လိုက်တေ . . ။

ယင်းနိက

ကျယ်လောင်မှုကို တိန်းဆိတ်ခြင်းကပြုခွင်း
 ကိုယ်စီနားလည်ခြင်းနန့်ယူဇနာ အကွာအဝေးကိုနောက်ခိုင်း
 ရှက်တကွန်သျှေ့ မျက်ရိပ်ထက်ကဘာသာစကားကို
 ဖတ်တတ်နှိုင်ခရေ ငါ့စွာ
 ဒုံနာလမ်းမာ ခြံလှမ်းတိကအယင်ပိုင်မဟုတ် . . ။



စုံလီပြန်ချိန်က အဂင့်ပင် အီးခဲလွန်းပါရေ
 ဇာပါဝါဖြူဖြူရို့လင်ပယ်ထဲပြီးဆင်းနီကတ်ယင့်
 အသက်မဲ့ကျောက်ဆောင်ရို့လှိုင်းသတ်တိုင်းတခွန်းပင်ပြန်မပြော
 နီရာလုစီးချင်းမာ အမှောင်ကပိုကြီးစိုးလှာရေ
 ချာလီကိုယ်သင်းရနံ့တဟုတ်လေး နှာခေါင်းမာဆိုလို့
 တဒင်္ဂအနီမကျခြင်းကြားမာ
 ငါအမြင်ချင်ဆုံးက နင့်အပြုံးတပွင့်ရာဖြစ်တေ . . ။

ဆယ်စုနှစ်များစွာထိ ငါ နီတတ်ခပါရေ
 ဂုတော့ခါ Sunday တရက်က အစိမ်းရောင်ပုစ္ဆာကို
 ငါတွက်တေ ပြီးကေ ငါ့ကိုငါ ပြန်တွက်တေ
 တခုခုလုပ်နီရေ ငါ့ခန္ဓာမာ အစာအိမ်တိလေးတခုခုလို့နီရေ
 အဝါးကိုမမျှော်တတ်တေငါစွာ အဝါးကိုမျှော်နီရေ
 ကာရန်ညှိရခက်လှာရေ တောင်းတချက်တိ
 ရော့ခီတတီးလုံးထက် အနက်ရောင်ကေသာကို လွမ်းရေ
 ဝင်းပစလရောင်ကယဉ်ကျေးခြင်းစကားသံကို လွမ်းရေ
 ဝတ်မုံကူးညည့်မာ ဖော်ရွေမှု အမှုအယာကို လွမ်းရေ
 အနုပညာတောမာ အနုပညာဆန်ယောင်ကို လွမ်းရေ
 ငါ နင့်ကိုလွမ်းရေ အလွမ်း အလွမ်းတိအားလုံးစွာ
 အမြင့်ဆုံးမော်ဒန်တပုဒ်ပင်ဖြစ်တေ . . . ။ ။

ရာဇဝင်သားကောင်

ကိုယ့်နာမည်ကိုကိုယ် ဆီးဆိုးပန်းဖော်ရာကအစ
 တသားတည်း
 ဆက်နွယ်မှုအားလုံးကိုဂရုတစိုက်ခမ်းနားချင်ခရေ
 အကျယ်တဝင့် ရပ်တည်ဖို့ကြိုးစားခအယူအဆတိ
 စည်ကားသိုက်မြိုက် ဈာပနအခင်းအကျင်းတခုပိုင်
 ဟုတ်ယာအထင်နန့်
 အဆုံးသတ်လိုက်ခါမှ ပြာတဆုပ်တော့ရလိုက်တေ . . . ။

ထုံးစံအရဆိုကေ ဝါသနာကိုဖျာကာပစ်ဖို့လား
 မဟုတ်သိ
 မြင့်မြတ်ပါရေတခါသုံးဖောက်ခွဲ အနုမာနကြားမာ
 ဥပါဒါန်အတိတ်ကံဆိုးကို ဘဝနန့်ဖသောက်တေ
 အစွပ်မှားပင်လီပင်စွပ်တကောင်နု
 ညီးကြိုင်သံထဲဆယ့်လေးရာစုပါရေ
 အဖုအထစ်များလွန်း ဆက်ထုံးဖြိုကျစ်ကြိုးတပင်က
 အယှုံးကိုတွက်လို့စစ်ပြီးလားရေကမ္ဘာကိုရှာတွဲခချင်ယင့်
 မသင်္ခါစရာထဲက
 မသင်္ခါစရာတိကိုအမှန်ပင်ဖွင့်ဖတ်ပစ်လိုက်ဖို့ . . . ။

သည်းခံတိုင်း ကောင်းစွာကားမဟုတ်
 ဆင်ခြင်ပါ
 တွေးတောပါ
 မကြောက်ပါကေ
 ပြတ်လူနီးပါးနန်းရာထွင်ရင်ဘတ်တိ
 ဟုတ်တိပတ်တိ နက်ယှိုင်းပါလတ်တေဒုက္ခကို

ကရုဏာသင့်စရာမလို . . ။

သီချာပါရေ
 အမြတ်ရဖို့လားအထာနန်စိုက်ကြည့်ရေအနိမ့်ဆုံးငါ့အသံတိစ္စာ
 စိတ်ကန္တာရတောမာ တလမ်းလုံးရီမွတ်ပါလတ်တေ
 တရီးပင်အိပ်စက်ခြင်းမဟိ
 အဆင်မပြေခြင်းထဲကိုယ်ရွတ်ရုန်းကြည့်ရေ
 မဖြစ်နိုင်စွာတိ ရီတံရှင်တခုပိုင်
 ခြံဆန့်ဂေါင်းဆန့်တနွံတလျား
 အခြင်းများရေလောကမာအဖျင်းတိလေး
 ဖောက်မပေါက်ယောင်ပျစ်တေ
 ဇာလောက်ထိဖြစ်ပျက်နီဖို့လေး . . ။

အဆုံးထိတွက်ကြည့်ရေ
 လာဘ်လာဘနောက်ခိုင်းမြောက်ဦးမြို့ကျုံးတံတိုင်း
 ကျီးအော်ခြင်းကြားမာ
 ဟစ်တာလာကို ငါမသိ
 မိုနာလီဇာကို ငါမသိ
 စီရော်နယ်ဒိုကို ငါမသိ
 ဗီးနပ်စ်ကို ငါမသိ
 ခရစ်တော်မပေါ်မီကအစ
 မာရယုကို ငါသိရေ
 မင်းဗာကို ငါသိရေ
 သမ္မတရာဇာကို ငါသိရေ
 ငါစွာ အခါခါသီဆုံးအဆိပ်သင့်ရရေ ရာဇဝင်သားကောင်
 ယေနန့်
 နှစ်ရာငါးဆယ်ခုနှစ်မင်းအပေါင်းကို ငါသိရေ . . . ။ ။



ခြံပ်ရိုးတမျှင်ဒုအလင်း

အာရက္ခဝဠာအတွက်စိမ့်ဖြာထွက်လတ်တေ

ခြံပ်ရိုးတမျှင်အလင်း

ခြံပ်ရိုးတမျှင်အလင်း

ခြံပ်ရိုးတမျှင်အလင်း

အမြစ်တွယ်ရင်သားကန်ဆာကပြည်ပျို

ပြည်အိုရိုးတနုထွတ်စား

အတိတ်ထည်ဝါခြင်းမိသုကာတိ

သွီးအိုင်လူးဟောင်းလောင်းပွင့်

ခြံပ်ရိုးပြီကွဏ္ဍဝင်ညည့်ထက်သစ္စာတော်တည်ရင်ဘတ်နန့်သီကုံးခ

ခြံပ်ရိုးတမျှင်အလင်း

ခြံပ်ရိုးတမျှင်အလင်း

ခြံပ်ရိုးတမျှင်အလင်း

လာပျာ

အနတ္တဒေသနာတပုဒ်ကိုယ့်အိမ်မာ

အလူအယက်ဖူးပွင့်လှာကတ်ရ အညကြရို့ခမျာ

အရိုးတွန်ငိုခြင်းဖွဲ့မညှိုးအကုသိုလ်ပန်းတိလန်းဆန်း

ပစ္စက္ခအရုဏ်ကိုနှိုးလို့ခရီးဆက်လှာကတ်

နန်းပျောက်သခင်ရို့အတွက်

ခြပ်ရိုးတမျှင်အလင်း

ခြပ်ရိုးတမျှင်အလင်း

ခြပ်ရိုးတမျှင်အလင်း

တနားသျှောင်ဖြစ်ဖြစ်

သိုင်ခေါင်တိုင်စည်းပြီအတ္တနန်းထီးမိုးအရိပ်ခိုလှုံချင်သူရို့

ဝံသာနုကိုဖဝါးချင်းတိုင်း အဆီငင်ယစ်လုပ်စားလှာကတ်

ပျံသန်းမှုအနီအထားအရ

တက္ကိ အချို့ ပုံသဏ္ဍာန်အချိုးအဆစ်မပြေပြစ်ခြင်းများ

၃၆၅ ကို မပြည့်ဝခြင်းနန်းပေါင်းသင်းဝမ်းနှုတ်ယင်း

အကြိမ်ကြိမ်ကျံရ

သန္ဓေဖျက်စိတ်ကြွဆီးပြားကငြိစွန်းရွတ်ကင်းလှာသော

ခြပ်ရိုးတမျှင်အလင်း

ခြပ်ရိုးတမျှင်အလင်း

ခြပ်ရိုးတမျှင်အလင်း

တခုခုဆို အရက်ဖြူခွက်ထဲယောက်ျားပီသလှာကတ်

ပလတ်ဖြုတ်တရိုးရိုးအလွန်မှအပျဉ်းထောင်တတ်တေ

နှလုံးရည် လက်ရုံးရည်တိ

လျှို့ဝှက်ပြည့်နှက်နီရေလောကမာ

မပုပ်မသိုး မလျှို့ဝှက်သူတယောက်အကြောင်းကိုလိလာဖူးခ

ခြပ်ရိုးတမျှင်အလင်း
ခြပ်ရိုးတမျှင်အလင်း
ခြပ်ရိုးတမျှင်အလင်း

ဝင်လာပါလို့
ဝတ်ကျီတန်းကျီစိဟ
ဗလာကျင်းသစ္စာကိုအကြိမ်ကြိမ်မှောက်ချ
တဝစားနောင်တကပြောရေ
တန့်ပါဖိ
ကုန်စီးနှုန်းတိအဆမတန်မြင့်လွန်းပါရေလတ်
သက်ရွတ်တောက်ပြောင်မှုအထွဋ်အထိပ်ကြားက
ဖျာကြမ်းတဝက်နန့်အမင်သွီးကြောလောင်းရိပ်ကင်းချင်ခရေ
ခြပ်ရိုးတမျှင်အလင်း
ခြပ်ရိုးတမျှင်အလင်း
ခြပ်ရိုးတမျှင်အလင်း

ဒေအချိုးတိ တဆိပင်နောက်ဆုတ်ခြင်းမဟိ
ဆီးမစင်အမဲစွန်းလှာရ အရူးအမူးစိတ္တဇမျဉ်းပြဿဒါးအရ
လိုရာဆွဲ ညှိစိုစိုဆိုးရနံ့တသီးပုဂ္ဂလမနုဿတောနက်မာ
ပြောင်းပြန်လှန်ချိုး စာနာမှုတိဒူးထောက်ခယ
တခုခုကိုချော်ချဖို့
သတ္တိဗျတ္တိနန့်ညည့်ကိုအမှတ်ခြစ်ဒေသမိုင်းကိုရိုးဆွဲခ
ခြပ်ရိုးတမျှင်အလင်း
ခြပ်ရိုးတမျှင်အလင်း

..... || ||

ရိုင်သမ်

အဆင်မပြေစွာကို ပြောပြဖို့
ဆာဟာရမျက်လုံးရိုင်းတောင်ဖံတိ
သျှစ်မျက်နှာစလုံး တပ်ဆင်ထားလိုက်တေ။

အခါယူအထီးကျန်မှုက ဝင်လိုက် ထွက်လိုက်နန့်
ဘီသိုဗိန်တီးလုံးခန်းခြောက်ရ နပိုလီယံလမ်းကျဉ်းမာ
အစိမ်းရောင်မာကျူရီတိ လှလှပပ ပြားစားနှိုင်လွန်းရေ။

ဆန့်ထုတ်ခ ကွဲကောက်သောလက်များ
နဖူးရင်ခွင်ကအိပ်စက်ခြင်းကို ပြောင်းရွှေ့လိုလားခ
သက်ပြင်းရိုင်းရိုင်းတိ . . . ။ ။



ပုစ္ဆာ

ဟုတ်တိပတ်တိ တည်ထွင်ဆန်းသစ်လှကတ်
 အညွန့်တလူလူ ဗလာကျင်းခွဲမိုင်းတိ
 ဒဏ်ရာထဲထိုးစိုက် နိမိတ်ပုံနှိုးအက္ခရာများ
 သံသယစူးကိုရာသီအလိုက်စိုက်ပျိုးပါလတ်တေ
 တခါက ယှုံးနိမ့်မှုအတွက်ဆိုယင့် . . . ။

ကျယှုံးခြင်းများစွာနီရဲသောလက်များ
 အဘိဓမ္မာမဆန်ခ သံပတ်ပီးစိတ္တဇညဆိုးထဲ
 စစ်အတွင်းယိုစီး ကျိုးသံ ငိုသံ တုန်လှုပ်သံများ
 ပယောဂမကင်းသော နောင်တသံတိ
 သံသရာပတ်လုံး ရှိလား နောက်လိုက် စွန်းထင်းပါလတ်တေ
 . . . ။

ဖို မ ဓာတ်သဘောသဘာဝအရ
 စွဲမက်မှုနုနုအလိုတူမနမ်းယှိုက်ပါပဲ
 အရိပ်စစ်တခုလုံး မျက်ရည်၎င်းပြန်နုနုခအဆိပ်
 ပပါးသျှော့နုနုမီးထတောက် ရက်စက်သောအငြိုးများ
 ဝင်းဝါနီလိုက်ပုံက တလက်လက်ကိုထလို့ . . . ။

သိပုံနည်းကျကျ အငွေပျံ့ဆုတ်ယုတ်ခြင်းထဲ
 တဖြင်းဖြင်းလှုပ်ခါနိုးမိသရွှိ
 ကြက်သီးမိုးညှင်းရို့ဖြိုနုနုဖြိုနုနုထ ထုံကျိုလွန်းပါရေ
 မျှော်စင်ကျွန်းက
 အလင်းဖောက်အားနည်းဗီတာမန်စီဓာတ်ရို့စွာ
 ရာခိုင်နှုန်းအပြည့်နုနု အံချော်လွဲလားရယုံကြည်ချက်အချို့
 . . . ။

ဆန့်ကျင်ဖက်ရွှေမျှော်စိုက်ခင်းထဲ
 ပုံမှန်ထက်အဆီကျပျားရည်တစက်နုယူနုနုနုနုနုနုတိ
 ပပါးချချပ်နှိမ်းကျံ ရသတခွက်ကိုယ်အိမ်ကိုလိုက်စား
 ဝမ်းနည်းမှုက အနန္တအသင်္ချေပ . . . ။

မအောင်မြင်မှုအတွက် သတင်းလက်ဆောင်ပီးပို့ချင်ခရေ
 အဆုံး အစ ခိုင်ခန့်မှုပမာဏက အမှောင်နုနုတသားတည်း
 ကဏ္ဍတခုစီက လူပီသ မပီသခြင်းဆိုစွာ
 အဓိပ္ပာယ်များ စိုင့်ဆက်မပြတ်စိမ့်ဝင်သော ပုစ္ဆာက
 ဒေပိုင်ဟိရေ . . . ။ ။

ကဗျာ

လမမြောက်သောညည့်စေတန်မိစ္ဆာလက်တော်အပါး
 မလွတ်မလပ်အသွင်ပြောင်းပန်းဝတ်ဆံ့သူခုမအမ္မိအနှစ်တိ
 သကြင်ပေါင်းများစွာ မမာမကျန်းအသက်ငင်မှုများ
 ပစ္စက္ခပြုယုဂ်ထက် ဉာဏ်နီဉာဏ်နက်
 ရှင်သန်အကင်းပါးမှုများ
 အတိတ်ငတ်အာသီသတိ အခါခါသီစီရ
 လူလားမမြောက်ခြင်းများ
 ပြဿဒ်ကလောင်ရေမီးအညှက်ကိုထိုးချပစ်
 ရဲရင့်ခြင်းပဋိညာဉ်ပတ်စီ
 အဇ္ဈတ္တသန္တာန်မာ တည်မဲ့ အာပွင့် ကဗျာလက်နန်
 ဒေသမိုင်းအမှောင်တန်းခါးကို တိုးဖွင့်ဖူးခယင့် . . . ။ ။

ဆက်လို့ကြိုးစားပါအုံးမေ။

ဝံသ

၂၀၁၆ ခုနှစ်၊ ဒီဇင်ဘာလ။

